

श्री अग्रस्वामी अष्टयाम पदावली

श्री अग्रपद (१) रजनी अल्प राम उठि बैठे सोइ गई सीता ह्वै गयो भोर ।
वार बार विधु वदन विलोकत मानो पीवत सुधा चकोर ॥
हरे हरे चुम्बत चमकन डर कर सों चिबुक चारु टकटोर ।
जागि परी जानकी ताहि छिन आलस पगे नयन की कोर ॥
बहुरिअंक आरोपि पिया को गौरस्याम शोभित इक जोर ।
अग्रअली ऐसी छवि छाडे धिक जाके आवै उर ग्रौर ॥

श्री अग्रपद (२) भोरभये नव रंग महल में राजत जनक लडैती लाल ॥
स्याम गौर अंशन भुज दीन्हें कछु आलस युत नयन विशाल ॥
प्रेम मगन दोउ उरभि रहे हैं कनक लता जनु डार तमाल ॥
अग्र सहचरी तन मन वारत उभकि भरोखे भाकति बाल ॥

श्री अग्रपद (३) उठे दोउ अलसाने परभात ॥
दशरथ सुत श्रीजनकनन्दनी सौधे भीने गात ॥
विमलादिक सखि चँवर डुरावती हरषि निरषि मृदुगात ॥
अग्र अली को श्रीरज दीजै सकल भुवन के तात ॥

श्री अग्रपद (४) आरती हरन आरती राम की ।
मुरतरु मुधा धेनु चिन्ता मणि वरषा पूरण काम की ॥
दीपावली प्रतिबिम्ब अंग में शोभा सब सुख धाम की ॥
अग्र अली वरनै युग चन्द पर जानकि जीवन नाम की ॥

हिडोल

श्री अग्रपद (५) देखो झूलत राधो डोल ।
जनकमुता लीन्हें संग शोभित गौर श्याम तन लोल ॥
हीरा पन्ना लाल पिरोजा रतन खचित वे मोल ।
क्रीडत राम जानकी दोऊ बाजौ दुंदुभि डोल ॥
हँसत परसपर प्रीतम प्यारी आनन्द बढ़यो सचोल ।
अग्र अली सुनि २ सुख पावती बोलहि मीठे बोल ॥

— ० —

जै रहे अवधेश ललन मिथिलेश लली की जै रहै ।
पिय सांवरे सोहैं घटा सिय दामिनी सी छा रहै ।
वातें मधुर रस रहसि के आनन्द जल वर्षा रहै ।
अति रंगभरे झुनै दोउ दोउ ओर सखिय झुलावही ।
भोका सरस भुकि भुमि भुमि भूषण भूमा भग बजि रहै ।
चहुं ओर से नागरि खड़ीं बाजै सुमधुर बजावही ।
कोउ तान लेती तरंग सो चातक मयूरिसि होइ रहै ।
तिरछी नजर हंसि हेरि हेरि फुजगेंद की चोटै चनै ।
श्री प्रेम अलि यह चाहती नित नैन में छाये रहै ।

दतुवन

राम सिया पग धोवति अलियां ।

निजकर कमल सनेह सुरलियां ॥

मनुरवि किरण सुवर्ण सुपात्रनि कुडमल कर पंकज मनु कलियां ॥

विगसि मलति धोवति हिय लाबति चूमति शीश नैन परसतियां ॥

मृग मद मलय कपूर सुकेशर सुरभित जल भारी कर धरिया ॥

अरुण पीत पुनि अरुण नील दल दल बिधुकिरण कमल छवि छलिया ॥

गोद राखि सौन्दर्य चरण दोउ चिन्ह बिलोकति निज सुख थलियां ॥

श्री अग्रपद(६) दतुवन करत दोउ मिलि जोरी । दशरथ सुत श्री जनक किशोरी ॥

मृग मद मलय कपूर सुवासित युगल दातुवन सखि दइ कोरी ॥

इक प्यारी इक प्रीतम के कर मज्जन लगे दन्त सुख सोरी ॥

हंसि २ मज्जन करत परस्पर बातें करत मधुर मुसुकोरि ।

दन्तावलि भलकत दोउन के छिटकी रही कर चन्द करोरी ।

दोउ के दन्त धोबावत हंसि २ अग्र अलि सन्मुख रस बोरी ॥

श्री अग्रपद(७) दन्त धावन-दतुवन करत सिया रघुराई ।

सुन्दर सुखद रसीली दतुवन रदन धरत छवि छाई ॥

जोमी कर जल परसत दोऊ मुख प्रछाल अगुछाई ।

अग्र अली उरभी चितवनि में मन्द २ मुसुकाई ॥

मंगल

श्री अग्रपद(८) मंगल करि शृंगार सुतन मंगल मई ॥

मंगल थार सजाई द्रव्य मंगल मई ।

मंगल यूथ बनाई सखिन मंगल मई ॥

मंगल कर लिये सौज चली मंगल मई ॥

पहुंची हेमनिवास जहां मंगल मई ॥

निज २ सखि लिये वाद्य वजावत रस मई ॥

गावन लागि बहु नारि राग मंगल मई ॥

आलस युत सिय प्यार जगे मंगल मई ।

सखी सब भांभरि माह विलोकती सुख मई ॥

देखत युग विपरीत रहस मंगल मई ।

विनदुक्कल भलकात गात सब रस मई ॥

लखि सखि सब सुख सिन्धु मगन मंगल मई ।

बैठे दिय गलवाहि रूप मंगल मई ॥

पुनि दई परदा खोलि भांकि मंगल गई ।

सखि सब रूप निहारि बारि तन मन दई ॥

पुनि दोउ को बैठाइ चौकी रतनन मई ।

मंगल द्रव्य दिखाई प्यारी प्रीतम नई ॥

पुनि कोउ के शृंगार करी मंगल मई ।

मंगल भोग लगाई शेष सखियन लई ॥
 आरति करि पट वारि वारि मंगल मई ।
 अंग अंग छवि अवलोकि सखिन वलि २ गई ॥
 मंगलमय यह ध्यान अग्र जे गावई ॥
 पिय प्यारी रस महल टहल सुख पावई ॥११॥

श्री अग्रपद(९) मंगल आरति करि सखि राम रिझाई कै ।

भूषण कछुक उतारहि प्रभु मन पाइ कै ॥
 कोइ सखि पट पहिरावहि दूसर छोरि के ॥
 अष्ट कमल दल मणि चौकी दुइ जोरि वै ।
 द्वौ चौकी वसु २ सखी टहल चतुरि बड़ी ।
 अष्ट कोण दल २ पर आयसु लखी खड़ी ॥
 वागीशा, माधवी, प्रियाहरि, मनजीवा ।
 नित्या, विद्या सबिद्या, कूटरूपा—सीवा ॥
 आठौ मुख्य ढिगन द्वौ खड़ी सोरह सखी ।
 अवरनि ते लै देहि आठ कह मन लखी ॥
 सिय चौकी पर मुख्य आठ सोरह सखी ।
 जस रघुवर सेवा महं तस सिय के लखी ॥
 विमला, उत्कर्षणी, क्रिया, योगा, , प्रवी !
 इशाना, ज्ञाना, सत्या, सेवा कबी ॥
 आठ आठ जे मुख करहि मन की लखी ।
 समय समय सब लिहे अपर कोटिन सखी ॥
 परम मुख्य सखि पांच सुशीला, लक्षमना ।
 हेमा, अतिशीला, सुचारुशीला मना ॥
 पांचहुं की आज्ञा सुसर्व सेवा सुची ।
 अर्ध देति सखि अग्र राम सिय की रूची ॥

रंग भरि जोड़ी, सदा चिर जीवो ।

सदा बिहार करो रंग मन्दिर रंग किशोर किशोरी ॥
 सदा सुहागल के अनुरागिनि रंगे रहो बड़ भाग बढोरी ।
 प्रिय के प्राण बसो सिय सुन्दरी सियमत स्याम वसोरी ॥
 पियकी चाहसु चात्रिक लौ रहो सिय की मया स्वाति बर्षोरी ।
 सिय मुख चन्द सुधा रस द्रवो नित पिय के नैन चकोरी ॥
 हमरे नैन प्राण की सर्वस अधिक २ सुख रस सरसोरी ।
 कृपा निवास उगास महल की टहन लगी सो लगोरी ॥

तेल उवटन

श्री अग्रपद(१०)

श्री प्रसाद प्यारी ओर प्यारे ओर चारुशील अंगन-
 सुगन्धमय उवटनो लगावती ।

दोउन के खुलेगात अंगन छवि भलमलात मानो शशि-
कोटि सुधा किरण को लजावती ॥
निरखि २ सुभग गात आनन्द डर में नमात कोटिन-
रति काम आली दोउन पै वारती ।
कोमल कर में सुधार उवटनो लै वार वार दोउन-
सखि हाथ अग्र देति रस भावती ॥

श्री अग्रपद (११) सिय प्यारे को (सखियां) लगावति उवटन ।
पद्म राग मणि की चौकी पर दुग्ध फेन सम बिछे बिछावन ॥
तापर स्यामा स्याम बिराजे कोटि मदन रति द्युतिन लजावन ।
अति सुगन्धमय तैल नरायन तामें और मिलाय सुगन्धन ॥
शिरप कुमुम हूं ते अति कोमल अंग २ सुकुमार निरखि तन ।
लै उवटन कर चहत लगावन करन कठोर समुझि हिय धरकन ॥
अति भयभीत सहमि सखि लगवति लखि अदभुत छवि वारति तन धन ।
कोई सखि प्रीतम अंग लगावति अग्र लगावति प्यारि सुभगतन ॥

श्री अग्रपद (१२) उवटन करत रंगाली अलियां ॥
युगल अली दोउ चरन लगावति अंग बिलोकति छलियां ॥
युगल २ सखि दोउ भुज मीड़त उर पीठन युग आलियां ॥
अग्र अली दोउ रसिक परस्पर मुख मीजत छलि वलियां ॥

श्री अग्रपद (१३) उवटन करत सिया रघुराई ॥
सरस सुगन्धन वन्यो उवटनो लेकर उर सरसाई ॥
जोई २ अंग लगावत प्यारे सोई प्यारी मन भाई ॥
अग्र अली के जीवन दोऊ निरखत हग न अधाई ॥

श्री अग्रपद (१४) सिया अस्नान उवटनाते अज किन्ही केतिक उत्तम नारी ।
तेई शील सुन्दर सौभागिनि बहुत गुनन के भारी भारी ॥
जानकि अंग तीरथ में न्हाय वाम भई जग में उजियारी ।
बनिता श्री रघुवीर वल्लभा अग्र स्वामिनी नहीं कोउसारी ॥

जल विहार

श्री अग्रपद (१५) —मज्जन करत लाल सिय प्यारी ।
अष्ट कोन युग चौकी तापर दोउ दिशी कनक कि नारी ॥
बैठे पिय प्यारी तिन ऊपर अंगन द्युति अनुसारी ।
चहुं दिशिते जल यन्त्र सखी लिय वरषि मुरभि सुठि बारी ॥
उमगि २ जल धार लेत शिर हंसी मिलि करत खेलारी ।
मलि २ अंग सखी अन्हवावति निरखत छवि बलि हारी ॥
मज्जन करि सर पैठी कलोलत भूषन वसन बिसारी ।
जल बिहार करि अग्र अली सब तट पट भूषन धारि ॥

यज्ञ

श्री अग्रपद(१६) यज्ञ (सु) करत रसिक सिय प्यारो ॥

सुरतर तर मनिमय वेदी विच दाहिन सिय पिय बाम निहारो ।
दाहिन इक अलिधार लिए कर पायम लैं सिय पिय कर धारो ॥
द्वादश आहुति युगल मन्त्रसों जातवेद तिपित किय भारो ।
हवन कुण्ड परिकरमा कीन्हे अग्र अलि के प्रान अधारो ॥

दान

श्री अग्रपद(१७) दिव्य मण्डप महा यज्ञ किये साजयुत दानदिये श्रुति सखी रूपआई ॥
विप्र तनया कही सीय रघुवर लही हरदि दधि अक्षतैले छिटाई ॥
धेनु भूषन बसन रत्न वासन अशन अन्न वाहन अगित दीनजाई ॥
पानिध्व अंग शृंगार दूसर किये पूजि पियप्यारी सबसखि सुहाई ॥

पति पूजन

श्री अग्रपद (१८) प्यारी कटि सारी जरतारी सुधारी अली प्यारे कटि धौती-
सुपीली भलकारी है ॥

प्यारी वक्षोज पर कंचुकी सुधारी भीनी प्यारे—

उर कंचुक सुमोतिन की धारी है ॥

प्यारी गले चन्द्रहार प्यारे गले मुक्तमाल अंगद औ—

पहुंची सुमूद्री नग जारी है ॥

चन्द्रिका शिपैच पाग कानन में कर्नफूल कुण्डल—

अलि अग्र हाथ आपने सुधारी हैं ॥

सियजु पिय पूजत प्रीति पली ।

यज्ञ दान करि हर्ष हृदय भरि जन जिय रंग रली ॥

मंगलमय शृंगार किये अलि प्रीतम प्यारि भली ।

निज र सौज सजी सखियन युत पास पिया के चलो ॥

चन्दन अतर धूप दीपादिक फूलन माल ढली ।

परिकरमा करि पिय बैठाये सिय सुख वेली फली ॥

पुनि सखियन पुजे दोउ प्यारे गान विनोद छली ।

आरति करि शौन्दर्य विलाकत वलि सुखमा सुथली ॥

कलेऊ

अग्रपद(१९) करत कलेऊ मिलि दोउ प्यारे ।

जनक नन्दनी अवध दुलारे ॥

बरफी मोदक तपत जलेबी खाभा घेवर अति रुचीकारे ।

बीज पाक रसगुल्ला खुरमा मोहनभोग पूष रस दारे ॥

पूरी कचौरी मठरी पापरि गुभिया गोभा मिसरी डारे ।

और अनेक भांति के व्यंजन कनक कटोरन अग्र सुधारे ॥

सास ससुर पूजन

श्री अग्रपद (२०) अंग २ करि शृंगार सखिय सब साथ में ।
 पूजन चलि सिय सासु प्रेम रस राग में ॥
 पूजन के सब सौज साजि लिए थाल में ।
 गावति नृत्यत चली सखिय उमगात में ।
 पहुँची सासु निवास अंग छवि को कहै ।
 कोटिन रमा प्रकाश सिया दूति अंग लहै ॥
 देखि सासु अति प्रेम वानसल रस भरे ।
 भरि अंकबार उठाय लेई निजहिय धरे ॥
 मस्तक की करिघान वलैया लेइ के ।
 इकटक मुख छवि निरखी अपनपौ भूलिकै ॥
 सासु गोद ते उतरि सीय पूजन करी ॥
 षोडष भांति विधान प्रेमरस में भरी ॥
 सासुन दई अशीश वधू अनु दिन बढ़ै ।
 प्रीतमसंग अनुराग कबहुं छिन नाघटे ॥
 गंग जमुन नहि रहै जगत या ना रहै ।
 अचल रहै अहिबात सिया पिया साथ है ॥
 पूजन करि सिय सासु प्राइ निज महल में ।
 प्रीतम करि आलीग अग्र सिय साथ में ॥

मामृ पितृ दर्शन

श्री अग्रपद (२१) रघुवर मातु महल को जात ॥
 भरत लखन रिपुदवन साथ लिये और लखन के ब्रात ।
 कन्ठ सुभग गजमुक्ता माला शिर पगिया भलकात ॥
 नख शिख साज शृंगार मनोहर सखन संग बतरात ॥
 धनुष बान करमें सुठि सोहत अंग लखि मदन लजात ॥
 मातु महल के पौरी पहुँचे तुरंग उतरि चहु भ्रात ।
 मातु समीप बैठी अनुजन युत करि प्रनाम नमि गात ॥
 गोद बिठाइ लाई कौशल्या मुख चूमत हरषात ॥
 बालक व्रत करि २ के चेष्टा मातु गोद हरलात ॥
 जननी देखि २ सुख फूलें आनन्द उर न अमात ।
 बहुतभांति पकवान मिठाई निज कर कमल खिलात ॥
 करि कलेउ अम्बा प्रनाम करि संय सखन सबभ्रात ।
 अग्रस्वामी निज महल पधारे प्यारि लपटि भरि गात ॥

वृहद शृंगार

सकल सुनारी प्यार परमभरि करत शृंगार संवारि युगलवर ।
 लहंग ललित कलित कटि ओनी कुच कंचुकी वागोवर नागर ॥

युगल कमलपद विमल महावरि रचित सुघरं लखि अरुण नैनकर ।
 पद पावन पद पान मनोहर पदज विभूषण पायल नूपुर ॥
 गुल्फै कमल जानु कटि किकिनि क्षुद्र घंटिका माल करनिगर ।
 उदर रोंम राजी त्रिवली वर नाभि सुभग सौंधी सींचत तर ॥
 मलय कपूर सुकेशर लेपन प्रिया उरोज सुप्रितम उर पर ।
 पदिक हार माला मोतिन की चम्पकली दुलरी तिलरी ढर ॥
 मणि माला मुक्तावलि कण्ठी चौकी चौक सु राम सुभग घर ।
 भुज प्रलम्ब अगद युत भूषण चारि चारु चूरी मुदरीपर ॥
 युगल वदन सुख सदन मनोहर चित्र कपोल चिबुक वैदिथिर ।
 दशनदमक दुति वीरी रोचिक बिम्ब बिलज्जित मृदु अरुणाधर ॥
 श्रवण तरोने फूल भूमका कनक लता मनु फूल फरी फर ।
 लाल श्रवण कुण्डल धरि सुघर निशशि मण्डल मनो कीन्ह मकर धर ॥
 नाशालटकन सहित नथुनियां दृग अन्जन खंजन तिमि नाशर ।
 भाल विशाल युगल श्राशाभित अर्धचन्द्र उपमा जग की हर ॥
 टीको वन्दी शीश फूल मणि क्रीट चन्द्रिका जटि मूक्ता लर ।
 अलक भुकाई इन्दुसदन जनुसुधा लोभ नागिनि न सकीटर ॥
 मुक्तन मांग भरी गुहि वेनी कछु उपमा आई मेरे उर ।
 शीश सुहाग पांति मनु उधरी परी सुपाठि गुमान गहर टर ॥
 दोउ कर सुमन छरी उपरना शारी सरस फैल फवि सुन्दर ।
 कृपा निवास श्री जानकि वल्लभ दुलरावति सहचरि रंग मंदिर ॥

अली शृंगार भवन मधि राजत ।

ललित विभूषण अरस परस दोउ अंग २ प्रति साजत ॥
 बडे चारु रतन चौकी पर सखमाशील अपार ।
 जनकललो रघुलाल सलोने रूप अमित रतिमार ॥
 नवल २ सखि करकंजन लिये दिव्य विभूषण ठाढ़ी ।
 कोउ दर्पण कोउ अंग राग लिये प्रीति अलौकिक बाढ़ी ।
 सजि शृंगार दिव्य सिंहासन बैठे छवि रस रासी ।
 चवर्ण पान दशक की चमकनि मृदुल बचन रस भाषी ॥
 छकी सखी पिय प्यारि रूप रस गावति कोकिल वानी ।
 भोजन मधुर कराई सखि अचवाइ दिव्य सरि पानी ॥
 रसिक अली आरति सजि ल्याई सौक साथिया पूरी ।
 मंगल कुम्भ रुचिर दीपावलि सौज सकल रचि ररी ॥

शृंगार आरती

सखि आरति करै रस प्रेम भरी सिय रघुवर को शृंगार करी ॥
 मनमय थार सखिन कर राजतवाती रवि शशि दुति निदरी ।
 वाजहि ढोल निशान दुन्दुभी शंख भांभ करताव घरी ॥
 नाचहि गान करहि सखि थेइ थेइ सुमन माल मणि होत भरी ।
 रामचरण सियराम रूप लखि सखि आन्नद रस सिन्धु परी ॥

सभा कुन्ज विहार

श्री अग्रपद (२२) मकुट उद्योत होत, दिन दिशिते, ब्रह्म काल नहि पावत ब्रह्मवित
आतुर अमर अगमनै धावत, रामचरन वन्दन निद्रागत ॥
उठि आवत जो जही तही ते भोर भये हेलें परसन को ॥
आमक भोर भुली ऋषि सन्ध्या दिव वाशी आये दर्शन को ॥
निवसत निकर असुर सुर नर मुनि कीट घोष जय घोष अपार ॥
अग्रदास बलि पाद पीठ पर वन्दी वेद करत कै बार ॥

श्री अग्रपद (२३) चंचल नारि तुम्हारि कीरती दशोदिशा को धावत ।
सुर नर असुर लोक लोकन में रघूपति तुव यश गावत ॥
घर घर वार फिरती कुलटा ज्यों निकट नाहि सुचि पावत ।
विसद विशाल जशहि विस्तारत यह अचरज मोहि आवत ॥
पतिव्रत प्रण छोडे है यद्यपि सबहि याहि सुहावत ।
सन्तन जीवन मूरि सदाही अग्रदास जिय भावत ॥

श्री अग्रपद (२४) अकरन न्याय कियो यही धाता ।
अति ही चतुर सृष्टि रचना को अग्र सोच समुझत अति धाता ॥
फणिपति रघुपति को यश सुनी कै जौपे मूड डुलावत ।
फूट जाय ब्रह्माण्ड खण्ड सब बहुरि करत दुख पावत ॥
याते उरग श्रवण बिन सिरजे जगत भंग डर आवै ।
विशद श्रुत श्री अग्र स्वामि के कौन न ग्रीव डुलावै ॥

चौपड़ खेख

श्री अग्रपद (२५) चौसर खेलत रसियालाल, प्यारी संग सुख आल ॥
सारी फल जरिदार मखमली स्याम पीत सित लाल ॥
पाशा हीरा के अति सुन्दर युग दल सखि कर चाल ।
श्री प्रसाद प्यारी दिशि चातुरि चारुशिला उतवाल ॥
दम्पति टोल हने गनि गोटी कौतुक कर सियलाल ।
चतुराई चित चोरत खेलत दोऊ नैन विशाल ॥
प्यारी हँसि प्रीतम को हेरत कर से न पाशा चाल ।
देखि लाल ठगवग से रही गये कुच विच इन्द्र सुजाल ॥
भूलि गये चतुराई आपनि जीत लई सिय वाल ।
हारि लाल सिय अधर बूमि लई अग्र धूर्त बडे लाल ।

श्री अग्रपद (२६) नर वर राम तिया वर सीता ।
या जोरी को उपमा नाही धाता निरखि रहो भय भीत ॥
सोच सन्देह करत चतुरानन दूजे काहू सृष्टि चलाई ।
उभय लोक पर्यन्त फिरयो पै यह मूरती गति कहुं नपाई ॥
वेद विचार कियो जब ब्रह्मा नेति २ इनही को गावत ॥
रामजी इष्ट जगतपति नियंता सोई अग्रदास जियभावत ॥

श्री अग्रपद(२७) राम से राम सीता सी सीता ।

शिव बिरंचि शारदा शेष शुक पटतर खेजि कलप बहु बीता ॥
सुन्दर शील सुहाग अमित गुन अखिल लोक नरनारी जीता ।
अग्र स्वामी स्वामिनी उजागर नेति २ श्रुति गावत गीता ॥

श्री अग्रपद(२८) जगत जपत रघुनाथ नाम सब राम जपत सीता को सुमिरन ।
रामचन्द्र को ध्यान धरत मुनि बसत जानकी रामचन्द्र मन ॥
शिव वियंचि के धनुषधरन धन रघुवर के मैथिली महा धन ।
परम हंस कुलराम भजन भर अग्र स्वामी इक पत्नी को पन ॥

श्री अग्रपद(२९) युवती गुण जानकी पतिव्रत भाग सुहाग सुभगता सागर ।
सत्य सोच जित क्रोध दययुत कीरति विशदलाज मृदु आगर ॥
एक नारि व्रत न्याय अमितगुन रिभय राम नयना वर नागर ।
त्रिया तिलक निर्दूषण भूषण अग्र स्वामिनि जगत उजागर ॥

श्री अग्रपद(३०) साचो सुहाग जानकी तेरो रघुवर भल वश कीन्होरी ।
परसत पानि और नहि परस्यो इक ललना व्रत लीन्होरी ।
तोसो नारि नहीं त्रिभूवन में पिया प्रेम रस भिनोरी ।
अग्र स्वामी मन वच क्रम तोको रीझि अलिगन दीन्होरी ॥

श्री अग्रपद(३१) इक नारि व्रत न्याय धरचो ।
अखिल भूवन अच्युतनहि हरि को निर्णय यह रघुनाथ करचो ॥
बनिता रतन शिरोमनि सीता शील सुजश सबही प्रचूरचो ।
ता तन मगन भये तनमयता पैठि राम नाहि न निकरचो ॥
कहा भये जो कोटिक पतनी सुख स्वारथ एको न सरचो ।
रूप उदारविनय लावणि गुण अग्र स्वामी मनो रथौ भरचो ।

श्री अग्रपद(३२) मेरी स्वामिनि सुहाग अद्वितिय पटरानी ।
रघुपति को अवर नारि सपने न सुहानी ।
लावनी गुन रूप शील सबहि लीक तानी ।
अग्र स्वामी सियाराम विदित जग कहानी ॥

श्री अग्रपद(३३) रूप रासि सोता दुलहिन को देखन आई गुरुजन नारि ।
उठत नही अतिकाल ह्वै गयो पढि मोहिनीमूढ़ मनो डारि ॥
रामचन्द्र मिलिवे कंह आतुर वासु कि शेष कठिन भयो भारि ।
अनंग पीन अकुलाइ दण्ड कर त्रासत तुरगनि बुद्धिविचारि ॥
रवि पूर्वज हमरो मंगल रथ प्रेरन को सुधि बुधि जुविसारि ।
ये अशु दर्शन उनके नाते बेगि चलो कुल जानि दुखारि ॥
सहि नहि सकत वियोग पलक को अस्ता चलतन रहैं निहारि ।
मदन तरंगनि मगन अग्र प्रभु पाई जीवन जनक दुलारि ॥

सखियों का गान

श्री अग्रपद(३४) वदनार बिन्द पर वलि २ कियो प्यारी ॥

कुन्द इन्दु विद्रुमजुविम्बमिलि मीन मृगलीन खंजन छवि हारी ।

नासिका कीर तिल पुट्टप दाडिम दसन हंसन—
 विगसन कमल कहा करे सारी ॥
 भाल दीपत मुकुट भीह राजीव वर,
 भृकुटि सर चाप मनमथ सत हारी ॥
 चिबुक त्रिभुवन चारु सुभग सुकपोल तर,
 आनन्द कन्द विधिना मँवारी ।

राम सुखदेन मधुवैन स्वामिनि अग्र जानकी नारि वर नृप दुनारी ॥
 श्री अग्रपद (३५) राम रमणि गज गवनि अवनिजा चम्पक वरनि मीन मृग नैनी ।
 वदन इन्दु अरविन्द कुन्द दुति अधर पिम्ब विद्रुम पिक बेनी ॥
 सीता के शौन्दर्य शील वृत उपमा सकल सकुच भई गैनी ।
 वनितावर त्रैलोक्य उजागर अग्र स्वामि उर आनन्द देनी ॥

श्री अग्रपद (३६) सब की सोभा सिमिट लई ।
 वैदेही को वदन विलोकत अन्तर भूत भई ॥
 गजगति हंस जंघ कदली कटि केहरि दसन अनार ॥
 कुच नारंगिकान्तिकल धौतहि मुख विधु अम्बुज चार ।
 गोवा कम्बु कपोत अधर विद्रुम दुति नासा कीर ।
 नैना मीन नागिनि बेनी अहि कोकिल गिरा गम्भीर ॥
 श्रीहत भये सकुच सब जित तित तप व्रत जाय लियों ।
 कोउ बन कोउ आकाश अग्नि जल कोउ पाताल गयो ॥
 बलि अरु वरुण वह्निवासवमिलि वदत भये यह बात ।
 सीता शरण गहो सब तजि कै अग्रदास बलि जात ॥

श्री अग्रपद (३७) मेरी स्वामिनि को अविचल मुहाग ॥
 जाकोपरसि अवर नहि परसी रघुपति दिन २ बढयो अनुराग ।
 सीतासी सिरजी न सपतनी केलि अकंटक लग्यो न दाग ॥
 अग्र स्वामि स्वामिनी अहर निसि सुख विलसत दोड भूरि भाग ।

श्री अग्रपद (३८) सर्वोपरि मम स्वामिनी रावो की प्यारी ॥
 जाकोपरसि अवर नहि परसी व्रत लीन्हो इक नारी ॥
 स्ववश किये दशरथ नृपनन्दन नाहिन कोऊ सारी ॥
 वदेही के कमल वदन पर अग्र अली बलिहारी ॥

आखेट लीला

श्री अग्रपद (३९) देखु सखी मृगया खेलन को राम लला चले जात ॥
 भरत लखन रिपुसूदन संग में सखन सोह बहु ब्रान ॥
 चतुरंगिनि सेना संग लीन्हें दुहुंभि ध्वनि बहरात ॥
 नखशिख सुन्दर गात मनोहर लखि दुति काम लजात ।
 घनुष वान कर में मुठि सुन्दर कटिभाया चमकात ॥
 चपल तुरंग नचावत हंसि २ शोभा वरणि न जात ।
 अग्र नयन सर नारिन वेद्यत लिये जात मन सात ॥

श्री अग्रपद (४०) रघुवर लागत है मोहि प्यारो ।

अवधपुरी सरयू तट बिहरै दशरथ प्रान पियारो ॥
 क्रीट मुकुट मकराकृत कुण्डल पीताम्बर पट वारो ।
 नयन विशाल माल मोतिन की सखि तुम नेक निहारो ॥
 अंग २ रूप अतृप बन्यो है चित से टरत न टारो ।
 माधुरि मूरति निरखो सजनी कोटि भानु उजियारो ॥
 जानकि नायक सब सुखदायक गुण गण रूप अपारो ।
 अग्र अली प्रभु की छवि निरखी जीवन प्राण हमारो ॥

श्री अग्रपद (४१) श्री राधो जिकि आज सजी असवारी ।

दशरथ राज कुमार लाडिले शोभा न्यारी न्यारी ॥
 सजे तुरंग रंग राजन के भीर गजेन्द्रन भारी ।
 जगमग भूल जरी की सोहे रतन जड़ाव अंवारी ॥
 धूम गरज सो भरत जी आये श्री रघुनाथनिहारी ।
 होत कुलाहत लखनलाल के रिपु सूदन छवि न्यारी ॥
 हरषे देव सुमन बहु बरषे जय २ कार उचारी ।
 ब्रह्मादिक दर्शन को आये मोहन बदन निहारी ॥
 रवि शशि कोटि बदन की शोभा चन्द्रकला उजियारी ।
 अग्र अली प्रभुकी छवि निरखे चरण कमल बलिहारी ॥

श्री अग्रपद (४२) अब देखो रामजी ध्वजा फहरानी ॥

भलकत ढाल फरकते नेजा गरद उड़ी असमानी ।
 लक्ष्मण वीर बालि सुत अंगद हनुमान अगवानी ॥
 कहत मन्दोदरि सुनु पिय रावण त्रिभुवन पति सैठानी ।
 जा सागर को गर्भ करत है तापर शिला तराई ॥
 तिरिया जाति बुद्धि की ओछी उनकी करत बड़ाई ।
 भुव मण्डल से पकरि मगैहो ओ तपसी दोउ भाई ॥
 हनुमान से पायक उनके लक्ष्मण से बलि भाई ।
 जरत अग्नि में कूदि परत है कोटि गने नहीं खाई ॥
 मेघनाथ से पुत्र हमारे कुम्भकरण बलि भाई ।
 एक बार सन्मुख होई लरिहै युग २ होत बढ़ाई ॥
 कहति मन्दोदरि सुनुपिय रावण तोहि मम एक न भाई ।
 राति को सपनो एसो भयो है सोनेकि लंक लुटाई ॥
 वन्दर एक लंक बिच आयो घर २ धूम मचाई ।
 बाग उखारि समुद्र में डारे लंका आग लगाई ॥
 गरवी रावण गरव न कीजै गर्वहि लंक लुटाई ॥
 जाय मिलो रघुनाथ कुंवर से लंक अचल हो जाई ॥
 इक लख पुत्र सवा लख नाती मौत आपनी ठानी ।
 अग्र स्वामि गढ़ लंका घेरे अजहु न चेत्यो मानी ॥

(४५)

श्री अग्रपद(४३) जब कर राघो जी वान बरेंगे ॥

संग रघुनाथ भीर वनचर के कपिदल कोपि चढेंगे ॥
 स्याम घटा घन भुकि अंधियारी सूरज गगन छिपेंगे ।
 पचरंग बाण राम लक्ष्मण के सागर तीर रूपेंगे ॥
 जा सागर को गर्भ करत है ता पर सेनु बघेंगे ।
 जामवन्त हनुमान नील नल महाबुनि गर्ज करेंगे ॥
 रात भयानक सपना देखो लंका कोट लुटेंगे ।
 नाम विभीषण बन्धु तुम्हारे रघुपति जाय मिलेंगे ॥
 मेघनाथ से पुत्र तुम्हारे वे नहीं वीर बरेंगे ।
 कुम्भकरण बल बन्धु तुम्हारे रण में जूझ सरेंगे ॥
 महिरावण से योत्रा मरि है लंका नाश करेंगे ।
 सहस योगिनी मंगल गावैं खप्पर बारि भरेंगे ॥
 दशधिर ओर बीस भुज तुम्हारे एकहि बाण हरेंगे ।
 जो नारद मुनि मुखते भापी भारत राम करेंगे ॥
 कहत मन्दोदरि सुनु पिय रावण रघुवर नाहि फिरेंगे ।
 अग्र स्वामी को लै मिलो जानकी किहु विधि विघ्न टरेंगे ॥

श्री अग्रपद(४४) हे यान चढे रघुनन्दन आय हनुमत चंवर दुरायोरी ॥

जामवन्त मुग्रीव विभीषण अरु अंगद मन भायोरी ॥
 करत पुनीत देव सब हरपे दण्डक वन प्रभु आयोरी ।
 देखि सिया दण्डक वन गोभा ऋषि विचरे भय त्यागोरी ॥
 चरित पुनित किये रघुनन्दन अवध निकट हरि आयोरी ।
 उतरे पुष्प निकट सरयू के रघुपति आज्ञा पायोरी ।
 चलत नृपित अति गये सकुच मानो मरुत जलद जल लायोरी ।
 व्याकुल अंध अवध जेहि कारण उदित अरुण होई आयोरी ॥
 होत अवध आनन्द बधाई सखियन मंगल गायोरी ।
 सुख अवलोकि कोक जिहि लाजै रघुपति पुरी सुहायोरी ॥
 चर अरु अचर हर्षवन्त तँह थँह रघुपति कोरति गायोरी ।
 द्विजन सहित आये नृप द्वारे अग्र दास गुण गायोरी ॥

श्री अग्रपद(४५) सीताराम अवधपुर वासी नित दरसन उठि पावैं जी ।

रघुवर लक्ष्मण भरत सत्रुहन शोभा वरणि न जावैं जी ॥
 सग सखा सत्तट विहरैं राम लखन दोऊ भाई जी ॥
 सुन्दर वदन कमल दल लोचन उर वनमाल सुहाई जी ॥
 अवधपुरी नर नारी निहारे निरखि परम सुख पाई जी ।
 मातु कोशिला करत आरती अग्र दास बलिजाई जी ॥

श्री अग्रपद(४६) (आवत) रघुनाथ अनुज संग लीन्हें, खेल किये चौगानै ।

अश्व सुगज रथपागे, वने विचित्रे वागे, —
 अरुण पीत सित चंवर छत्र वर वानै । खेल० ।

राजकुमारी अति सुकुमारी भरोखन भाकति विविध —
 मनोरथ ठानति, करत नयन मधु पाने ॥ खेल० ॥
 कोउ वारत तन, कोउ वारत मन, कौंउ वारत धन—
 निरखि नयन छवि, पुष्पाञ्जलि बरपानै ॥ खेल० ॥
 मंगल भाजन लै नीराजन, सब सुखसाजन प्राण—
 मिले जनु, जननि निरखि मन मानै ॥ खेल० ॥
 कियो प्रवेश सदन सीता के कलप वेलि तरु रंग —
 सीता के, अनग केलि रस रहस अग्र गुण गानै ॥ खेल० ॥

श्री अग्रपद (४७) करि सिकार आये रघुनन्दन संग सखन सब भ्रात ॥
 पितु समीप में जाय जुहारे सुत लखि अति हुलसात ॥
 निज कर कमल उठाय गोद धरि चूमत लखि भय गात ॥
 अति दुलार से पूछत पुनि २ खेटक के कुशलात ॥
 कहि सुनाय खेटक की बात सुनि २ पितु पुलकात ॥
 पितु प्रणाम करि निज बैठक में आय गये रसरात ॥
 रतन जड़े चौकी पर बैठे बैठक में सब साथ ॥
 श्रम सीकर मुख पर राजत जनु कमल कोष हिम पात ॥
 चहुँदिशि सखासौज सब लीन्हें सब सुन्दर सुठि गात ॥
 कोउ मुख ऊपर मधुर पवन करि निरखि २ बलि जात ॥
 बहु मेवा पकवान मिठाई सुरभी जल शितलात ॥
 भरि २ थालन में सजि २ के अम्ब मेजी बहुभाति ॥
 भ्रात सखन युत पावन लागे हसि २ बहु बतरात ॥
 एक २ सखन से बूझत प्यारे घर २ के सब बात ॥
 करि भोजन अचवन को करि कै पानखात मुसुकात ॥
 गानवाद्य होवन लागी पुनि आन्नद कहि नहि जात ॥
 पुनी प्यारी सुमरन हो आई मिलन हिये उमड़ात ॥
 गान वाद्य को करि समाप्त पिय शीघ्र चले अकुलात ॥
 अग्रस्वामिनी से मिल के हिय अति किन्ही शितलात ॥

श्री अग्रपद (४८) रघुनन्दन प्रभु भावै ।

उपवन बाग शिकार खेलि के चढ़े तुरंग नचावै ॥
 क्रीट मुकुट मकरा कृत कुण्डल उर मणिमाल सुहावै ॥
 कटि पर लट पट पीत बिराजै कर गहि बाजी उड़ावै ॥
 चतुरंगी सेना संग सोहति पचरंगधुज फहरावै ॥
 बचत निशान भेरि सहनाई गदग गगन मंह जावै ॥
 बन्दी जन गन्धर्व गुण गावत भावत प्रभु हि रिभावै ॥
 सुरनर मुनि ब्रह्मादि देवता इन्द्र पुहुप भरि लावै ॥
 अवधपुरी कि बधूटि अटाचढि निरखि परम सुख पावै ॥
 मातु कोशल्या करत आरती अग्र अली बलि जावै ॥

श्री अग्रपद(४६) देखुरी नीके रघुन्दन ॥

सीता कहति सखी अपनीसो रसिक राय शिर मोर स्यामतन ॥
दृष्टि चलत नहि इत उत सजनी रूप रासि सो मोमन फन्दन ॥
अग्रस्वामी मौ मोह वढ्यौ अति ज्यों चकोर चन्द हि अभिनन्दन ॥

श्री अग्रपद(५०) प्रीतम मग जोहति सिय प्यारी ।

कनक महल के खिरकी पर है सखियन युत निरखति सुकुमारी ।
रहि न जात प्रीतम विनु देखे गुणन सुभिरि पिय विरह निवारी ।
छिन २ विरह के उठत खुमारी विकल प्राण मनु मीन विचारी ॥
कोई सखि कहि पिय आवत हैं येह आतुर है तिहि और निहारी ।
तेहि छिन प्रीतम आय अग्र अलि भरि अंकवार मिली सिय प्यारी ॥

श्री अग्रपद(५१) छवीले दोउ आवत भोजन शाल ।

भूमत भूकत चलत मतवारे रसिक रंगीले लाल ॥
करत कटाक्ष परस्पर लपटत दीन्हे गरभुज माल ॥
हंसत हंसावत रस उपजावत संग सहचरी जाल ॥
प्राण प्रिया कछु कहत नवेली हरषित होत निहाल ॥
अग्र अली बैठे दोउ प्यारे निरखत भोग विशाल ॥

श्री नाभा दोहा

चरण पादुका सुमन युत चढि दीन्हे गल वांह ।
पंगत शाल अनूप जहां चले जानकी नाह ॥
चन्दन सिंहासन सुभग मणिमय जटित जराय ॥
सिय सियवर आसीन तेहिदीन्ही सखिन रजाय ॥
निज २ पीठिन सहचरी भई सकल आसीन ।
सो अवसर लखि ऋषि वधुन आनिथार घरि दीन ॥
कंचन थार अनूप अति ओदन मध्य सुवास ॥
व्यंजन चारि प्रकार के परसे सहित हुलास ॥

श्री अग्रपद(५२)

जेवत कु वर रसिक रघुनन्दन रस आगरि (नागरि) सिय प्यारी ।

छप्पन चार छऊ रस उपरस भोग सौंज सुखकारी ॥
चिन्तामणि चौकिन पर कोमल दुग्ध फेन सम सारी ।
तिन ऊपर रुचि जानि युगल की रचना न्यारी न्यारी ॥
पल्लव फल (रसमय) अ कुर कन्दावलि मेवा मधुरसुधारी ।
चटनी निकर आचार मुरब्बा अमित भांति तरकारी ॥
परसति परम किशोर नागरी जानि युगल रिझवारी ।
सुरभिवन्त शीतल सरयू जल मन्त्रित मंगल भारी ॥
रस भीनी बतियन विरमावति प्यावति निजकर वारी ।
अंचला विजन कमल कर सारति अति मृदु मंजु वयारी ॥
दम्पति एक थार निज मन्दिर जेवत मोद कन्द मृदुभारी ।
अग्र अली के जीवन दोउ तृण तोरति बलिहारी ॥

श्री अग्रपद (५३) मिलि जेवत श्री रघुवीर वने सखि संग लिए मिथलेश लली ।
 भुज अंश दिये बहियां जुलसै विहसै मृदु मंजु अनंग रली ॥
 करि कौर सिया मुखदेत पिया कहि स्वाद सराहत भांति भली ।
 रस के निधि दम्पति रंग भरे निरखें चहु ओर किशोर अली ॥
 मणि मन्दिर में भलकै प्रतिविम्ब मनोज के मानो विहार थली ।
 अवधपुर नित्य विहार करै लखि अग्र अली को आशा फली ॥
 दोउ जेवत हास विनोद मगन रस रंग उमंग अंग २ परसै ।
 यरसि परसि पर स्वातिक मातिक ग्रास उठे मुखना परसै ॥
 स्वकर सुधारस कौर सियाको लाल जिमावत हित दरसै ।
 दृगद्योर सिहाय सुभाग भरे कर कुमि महा मनमें हरपै ॥
 गीत वाद्य नव तान तरंगनि संग सुहागिनि सुख सरसै ।
 कृपानिवास प्रसाद मिलै मोहि जाको महा मुनि मनतरसै ॥

श्री नाभा दोहा

हंसि कह लाल सुनाइके अवला कंठ सकेत ।
 भोजन को अतिशय सिथिल हापविलास सचेत ॥
 भोजन करि बैठे पावत पान ।
 गोरी नवल किशोरी सियजू प्रीतम श्याम भुजान ॥
 कोउ अलि फूल माल पहिरावति अतरकरावति घान ।
 वीडो वदन अघर छविभलकत मन्द मन्द मुमुकान ॥
 प्रीतम हंसि प्यारी तन हेरत अरुण नयन अलसान ।
 प्यारो कर गहि उठे लाल तव रसिक अली सुखदान ॥

दिन का शयन

श्री अग्रपद (५४) रसिक दोउ शयन कुंज को जात ॥
 भोज करि शुचि पान सुचवित मन्द मन्द मुमुकात ।
 आस पास सब सहचरि राजै सुभग मनोहर गात ॥
 पहुँचे शयन महल के भीतर शोभा वरणि न जात ।
 अति गन्ध चहुँदिशि महं महंकत भंवर भुण्ड मड़रात ॥
 बैठे पलका पर दोउ प्यारे करत व्याग रस वान ।
 कोई सखि मधुरे वोण वजावत गान करत स्वरसात ॥
 पुनि दोउ मिलि अलसान लगेसखि परदा करि चहुकात ।
 प्रौढ गये जब दोउ पलका पर अग्र चरण सुहरात ॥

आरती

शयन समय मुख आरति कीजै लडिलि लाल निरखि छवि लीजै ॥
 युगल चरण मुख चन्द्र विलोकनि, नेमन (नैनन) सो अमृत रस पीजै ।
 रामसिया मुख सेज पधारे महामोद आनन्द रस श्रीजै ।
 जैति प्रसाद निवास अलीछवि एक पलक न्यारों नहीं किजै ॥

श्री अग्रपद(५५) दिवस मधि सोइ उठे सिय प्यारे ।

उत्थापन के समय समुक्ति सखि चहुं दिशिते जुनि सारे ॥
मदुरस्वरन गावत सुरसावत मधुर यन्त्र करधारे ।
अलसाने उठि वैठि लटपटे अंशभूजा दोउ धारे ॥
अंग वसन सजि सेज तरे परे पग पावड़ि मखमल धारे ।
मुखगज्जति पटपौछि शृंगारति अलक सुछवि घुंघबारे ॥
असन बसन भूषन मनिबारे आरति पलंग सुधारे ।
न्यौछावरि तृण तोरि आरती करत सुगान उचारे ॥
करि आरती प्रणाम अग्र दोउ दम्पति जैति उचारे ।
उतरि पलगते बाहर बैठे दिव्य सिंहासन प्यारे ॥

श्री अग्रपद(५६) दिवस उठि सेज रहे अलसाय ।

आरति करि पुनि उतरि पलगते दिव्य सिंहासन आय ।
मनिभारी अचबाय सखीसव निज अंचल अंपुछाय ॥
रतन कटोरन मेवा मोदक निज कर प्रियन पवाय ।
मिश्रित कन्द अघावट पद सुरभित सखिभारिपिवाय ॥
अंचबावति हंसि हेरि कटाक्षन सुछवि निरखि बलिजाय ।
अतर पान मालाउर अरुभनि अग्र सुकर सुरभाय ॥
दोहा—तेल उबटि अन्हवाय के कियो दिव्य शृंगार ।
ऋतु बसन्त अनुरूप वन दम्पति बैठे प्यार ॥
कछु शृंगार फूलन किषो अन्न पाय जल प्याय ।
पान अतर आरति नमन बाग विहार सिधाय ॥

शृंगार बन

श्री अग्रपद(५७) बाग बिहार करन चले प्यारे ।

श्री नृपनन्दन जनकनन्दनी रूपगुणन में दोउ उजियारे ॥
सखियन करि शृंगार अंग २ पुनिपिय प्यारी के शृंगारे ।
यूथ २ सखि चलि संग में हँ गज रथ ऊपर असवारे ॥
कोउसखि शिरपरछत्र किये है शुभ्रचंवर कोउ लिये करधारे ।
अपर सखी लिये बहुत सौज कर पहुँचे जाय बाग के द्वारे ॥
सखियनयुत गज रथते उदरे बागेश्वरि सुनि दौरि सिधारे ।
यूथ अनेक संग सखियन लिये पूजन के सामा कर धारे ॥
पट पावडे दै भीतर लैगई रतन वेदिका पै बैठारे ।
धूप दीप आदिक विधि करिकै सखियन युत पूजे दोउ प्यारे ॥
पुनि दोउ चले बाग विहरन कौं रोसनपर दोउ फिरत खिलारे ।
कहुं दोइ पुष्प उतरि कमल कर थाक धरि न्यारे न्यारे ॥
रचि २ भूषण विविध रंग के निज २ चतुराई विस्तारे ।
प्यारी पहरावति प्यारे को प्यारे प्यारी के अंगधारे ॥
मोर हंस सुक सारि पढावत मृगी भुण्ड रस चरित अपारे ।

कुन्जन मधि कहुं छट फुहारे ग्रीष्म पावस सम सुखसारे ॥
 कुन्जेश्वरी फल ढेर दिखाई पावत ग्रम प्रमोद अपारे ।
 फल रूपक हँसि अंग बखानत लपटी भूपटि कहुं कुन्जनिहारे ॥
 कहुं फूलन के गैद उछारत कहुं जलकेलि करै मत वारे ।
 विविध बिहार बाग बन कुन्जन करि पुनिग्रम महल पगधारे ॥
 किये दोऊ राजत सुमन शृंगार ।

बैठे कनक महल आगन बिच सुमन गुच्छ कर धार ॥
 प्यारी के शिर सुमन चन्द्रिका पियशिरै कलेंगि सुधार ।
 रसिक अली सिय रघुवर छवि पर वारिय बहु रति मार ॥

श्री अग्रपद (५८) हेम महल के सुभग कुन्ज में प्रिया प्रेम लम्पट सुकुमारे ।
 कबहूँ इकटक मुखछवि निरखत श्रमसीकर लखि करतव यारे ॥
 कबहूँ निज कर अलक संवारत अधर चूमि अतिहीन सुखारे ।
 कबहूँ निजकर चरण कमल लेई सुख निरखत तामै हँसि प्यारे ॥
 निज करतल पर राखि प्यारि पदयावक चित्रको करत विचारे ॥
 निज कर कमल कठोरसमुझि जिय घरर धरकत हिय भयभारे ॥
 अस न होय प्यारी के पद तल दरकि जाय लगि हाथ हमारे ।
 चूमि २ निज नयन लगावत डरि २ चित्रमहावर धारे ॥
 रूप देखि निज दृष्टि लगन डर वारि २ जल पियत दुलारे ।
 दृष्टि दोष अपने पर लेके वारम्बार होत बलि हारे ॥
 कबहूँ पुष्पबिभूषण रचि २ पिय प्यारी अंग करत शृंगारे ।
 प्रिया रूप में अति अशक्त है होन चाहत नहीं पल हून्यारे ॥
 समय जानि गुरु नारिन आवन अति कलेश युत दुरतदुखारे ।
 प्रिया प्रेम परतन्त्र स्वामिलखि अग्र अली तन मन धन वरे ॥
 धूम धुमार गुलाब को घांघरों पीत चमेली कि औढनिभीनी ।
 कंज के नील कसे कल कंठकि पीत जुहीकि संजाव जो दीन्ही ॥
 चम्प के हार कनेर के चन्द्रिका देखि के चित्र भईरति हीनी ।
 सरयुनि कुन्ज में राम सखे पिया फूल शृंगार सिय छवि कीन्ही ॥
 कीन्हें शृंगार गुलाब के फूलन सांवरो फूलिकै फूलन जो है ।
 कंचन धाम में धाम गुलाब को छूटि सुगन्ध दिशान कियो है ॥
 चम्पकली सि तियान के बीच में पंकज नीलकली जिमि सो है ।
 राम सखे सरयू के लतान में रूप वितान तन्यो मन मोहै ॥
 आजु गुलाब महल बिच दम्पति राजत सुन्दर वेष कियेरी ।
 सरयू तीर कुन्ज सुख पुञ्जन बिहँसत दोउ गलवांह दियेरी ॥
 फूलन के गहने अंगशो भित मनमथहूँ को मान लियेरी ।
 मोहनी नित्य दरत आनन्द में प्रेम वारुणी छाकि हियेरी ॥

ग्रीष्म का सरयू बिहार

श्री अग्रपद ५९ जल बिहार विहरत सीता संग सुन्दर वर रघुराई हो ।
 गृष्म काल तुषार सदृश मनु सरयू सुभग सुहाई हो ॥

चारुशिलादि सखीगण साथै शोभा वरणि न जाई हो ।
 न्यारी २ नाव सवन की सीतल सौज भराई हो ॥
 लेह्य चोष्य फल विविध भांति लिये सौरभ वरणि न जाई हो ।
 रहसि, कोट रचि नाव मध्य तह सौज सकल सजवाई हो ॥
 करन लगे जल केलि विविध विधि जल सीकर वर्षाई हो ।
 कमलन मारि कमल कर भेलत लाघव लेत बचाई हो ॥
 लपटि भूपटि कटिपट कर भटकत केलि करत छवि छाई हो ।
 कमला विमला मानसजा मिलि रचना विधि प्रगटाई हो ॥
 अदभुत कला केलि जल बिहारे लोचन लाल लखाई हो ॥
 सीताराम रसिक रस रग मग ललित बसन सजवाई हो ॥
 विविधि फूल फूले कुन्जन में केलि करत मनभाई हो ।
 अग्र अली तेहि वाग बिहारन सिय रघुवर सुख पाई हो ॥

श्री प्रमोद वन बिहार

देखो सखि आवत रास बिहारी ।
 सरयू तीर शृंगार विपनते अति अनूप छत्रि न्यारी ॥
 सीताराम मनोहर जोरी चितवनि की बलिहारी ।
 कुण्डल अलक हलक बुलाक की दलकत हृदय हमारी ॥
 सग सखी सोहैं अलवेली बनी ठनी छत्रि न्यारी ॥
 सुमन शृंगार किये नख शिख लौ निज कर स्याम संवारी ।
 प्रभु आगे सखि खेलति आवैं फूलन गैद उछारी ॥
 भुकि २ लेति परसपर मारत लखि अनन्द पिय प्यारी ।
 आयेदम्पति राम चरण सखि सुमन शृंगार उतारी ॥
 नख शिख मनि भूषण शृंगार करि सिंहासन बैठारी ।

परस्पर पिय प्यारी करत शृंगार ।

चन्द्र मुखी अरु चन्द्रकला दोउ देत सुधार सुधार ॥
 क्रीट चन्द्रिका ललित मणिन मय शिरघरि करन सुधार ।
 जनुघन दामिनि ऊपर राजत रवि शशि ज्योति अपार ॥
 कुण्डल करनफूल बुलाक नथ और विविध मणि हार ।
 कटि किंकिन उर पदिक जटित नग नूपुर अति रवकार ॥
 नील पीत अति रुचिर बसन तन पहिरे धूम धुमार ।
 नटनि वेष यह सिय रघुवर को रसिक अली हार ॥

सिंहासन राजत सिय रघुवीर ।

कोंटिन भानु प्रकाश सिंहासन कोटिन शशि सम सीर ॥
 कोटि काम रति छवि निन्दन दोउ स्यामल गौर शरीर ।
 मणि बहुभांति विभूषण शोभीत नील पीत पट चीर ॥
 बहु सखि धूप कि युक्ति वनावहिं बहु सखिदीप सजीर ।
 बहु सखि रचि नैवेद्य लगावहिं बहु सखि लीन्हे नीर ॥

बहु सखि मुख मज्जन पट लीन्हे बहु सखि लीन्हे वीर ।
 बहु सखि छत्र ब्यजन चामर लिये बहु सखि करत समीर ॥
 बहु सखि बाजन विविध बजावहि ताल देत अतिधीर ।
 रामचरण सखि गौरी गावहि मधुरे स्वर गम्भीर ॥
 दोहा-खोवा के सब खेल रचि-फल पल कल जल वास ।
 रहसि कलेऊ कीन्ही दोउ-सखियन बुद्धि विलास ॥

रास आरती-आरती करिये सिय बरकी, नख शिख छवि धर की ॥
 मृदुतरवन में अधिकललाई, हासविलास न कछु कहिजाई,
 चितवनि की छवि अति मुखदाई, मनही मन फरकी ।
 नीलपीत अम्बर अतिराजै, मुखनिरखत सारदशशिलाजै ॥
 तिलक भलक भालन पर भ्राजै, कुम २ केशर की ॥
 कर्णफूल कुण्डल हलकत है, चन्द्र हार मोती भलकत हैं,
 कर कंकण की छवि चमकत है, जगमग दिनकरकी ॥
 सिंहासन पर चंवरदुरत है, भांभवजत जै जै उचरत है,
 सादर अस्तुति वैद करत हैं, लुटरनि अनुचर की ॥

श्री अग्रपद(६०) जय २ श्री बन प्रमोद रसिकन सुखदाई ।
 सरयुतीर दिव्य भूमि वेलिलता रहि भूमि फूलन प्रति भंवरा अति गुन्जतमनभाई ॥
 कुञ्ज २ प्रति अन्नप विलसत तहँ युगल रूप जनक लली रघुनन्दन मधुर २ ताई ॥
 चन्द्र कला विजयादि नागरी नवीनी अति मधुरयन्त्र लीन्हे कोउ सप्त स्वरजमाइ ॥
 गावहि सब दिव्य तान सुनहि लाल अतिपुजान रास सरस भीज मन्द २ मुसुकाई ॥
 अग्र श्री विपिन राज यह सुख तहँ नित समाज-
 जानत कोई रसि कभेद जिन यह सर पाई ॥

श्री अग्रपद(६१) रागधनीं श्री नामो जानकी जगत मनि रूप कमनी ।
 वदन विभु रुचिर रद हाशईपद सुखद राम हृदकामकी नाप समनी ॥
 नमो सुक नासिका नैन मृग मोन छवि भालभर भाग सौभाग्य दरसै ।
 प्रेम पूरित वैन अलक इक उर ऐन सहज अलवेलि पिय मनहि करषै ॥
 कण्ठ सु कपोतिनी उरजउत्तंगिनी सिंह मधि देश सम श्रोणि सौहै ।
 जघ कदली कर्भ गर्भ गति हरति इभु अदुति नख चन्द्र उपमा न कोहै ॥
 विशद सतकुम्भ सम भाति आभा वपुष मनिबचित विविध भूषननि धारी ।
 व्यालि वेनी दण्ड अंग दीपति चण्ड सुभगता सनिरही राम प्यारी ॥
 भरत संगीत गन्धर्व कला, कोक निधि सुधरवर नारि सब शीष नावै ।
 रुद्र ब्रह्मादि कवि अवर केते कहीं स्वामिनी अग्र नहि पार पावै ॥

श्री अग्रपद (६२) जय जय रघुनन्द चन्द रसिक राज प्यारे ॥
 अंग २ छवि अनग कोटि वारि डारे ।
 विहरत नित सरयु तीर संग सोहे सखिन भीर—
 सिया अंश भुजा मेलि अवध के दुलारे ॥
 कोई सखि छत्र लिये व्यजन लिये कोई—
 युगल सखि चंवर लिये करत प्राण वारे ।
 सुन्दर सुकुमार गात पुष्पमाल सकुच जात परसत-
 भयभित होत रूप के उज्यारे ॥
 नख शिख भूषण अतृप यथा योग यथा रूप—
 कोटि चन्द्र कोटि भानु निरखत दुति हारे ।
 मन्द २ मसुकुरात प्यारी संग करत बात देखि २
 अग्रअली तन मन धनवारे ।
 शरद पूर्ण विमल चन्द विमल महि अनन्द कन्द—
 राम चन्द्र रास रच्यो देखन सखि वाई ।
 सरयु पुलिन विनल कूल फूले वहू रंग फूल कमल—
 चम्प केतकी कदम्ब सुरभी छाई ॥
 बोलहि सारो मयूर कोकिला मराल किर गूँजहि—
 अलिसकल राग रागिनि वनाइ ।
 किन्नरि अप्सरा गान मुर्छन स्वर ताल तान बरहि—
 भूमि तरुन लतन नीर गगन जाई ॥
 बाजहि मृदंग जंग सारंगी तमूर चंग वीण वेणु—
 आदिक स्वर तालगति सुहाई ॥
 युग युग सखि बीच एक मध्य राम नृत्यत संगीत—
 ताण्डवी मुदंग गति अनेक ल्याई । गावहि षट—
 रामराम रागिनि स्वर ताल ग्राम सबधरि सखिरूप—
 राम रास हेतु आई ।
 जानकि रघुनन्दन मन भावित भै रैनि ब्रह्म—
 रामचरण सर्व जीव परमानन्द पाई ॥
 देखो सखि अति अनन्द रास रच्यो रामचन्द्र—
 रजनी छवि छिटकि रही शारद चन्दनी ।
 बहुसखि मण्डला कार नृत्य गान स्वर सम्हार नृत्यत—
 रघुनन्दन मिथिलेश नन्दनी ॥
 कंचन मनि लसत भूमि नृत्यत पग चपल धुमि—
 तूपुर छम छनन छमक छमक छन्दनी ।
 कमला विमलादि तान राग अनुगादि गान करहि—
 राग रागिणी कला कलन्दनी ॥
 चन्द्रकला वीणा मूर्चग धुनि मृदंग मधुर अपर सखिगु-
 सितार तार तार तरंगिनी ।

ताधिग धिग धिग ताधिग धिग २ ताधिन्ता धिन्धुवट-
धुवट धिधि कट धिधिकट प्रवन्धनी ॥

उघटत संगीत राग ताल मुछ्छनादिग्राम हाव भाव पानि-
मुरती नन खजनी ।

रामचरण युत समाज मेरे हिय में विराज यह विहार
नित अखण्ड रसिक मण्डनी ।

श्री अग्रपद (६३) सखिन विच नृत्यत युगल किशोर ॥

विपिन प्रमोद सरोजा तटपर दिव्य भूमि चमकत चहुं ओर ।
चक्राकार रास मण्डल रचि राग रागिणी के कलशोर ॥

विमला चन्द्रकलादि रंगिली बीण मृदंग लिये करघोर ।
चारुशिल। शुभगा हेमा लिये मुरलि मुचग किन्नरी जोर ॥

चन्द्रा चन्द्रवती मिलि गावति क्षेमा स्वरहि भरत रसवोर ।
मदनकला करताल वजावति सारंगी नन्दा टकोर ॥

पियशिर सुभग मुक्रीट विराजै चन्द्रिका सीता के शिर रोर ।
चन्द्रहार प्यारी उर चमकत पिय उर मोतिन माल उजोर ॥

कौटि २ रति काम विमोहन नटवर वेष श्याम अरु गोर ।
रूप माधुरी कहिन परत हैं अंग २ छवि के उठत हिलोर ॥

कर से कर दोऊ मिलिधारे नयनन शैन चलत दुहुं ओर ।
कबहुं अधररस पियतपरसपर रस मतवारे दोउचितचोर ॥

प्यारीहाव पियामन करसत पिय केभाव प्यारी निज ओर ।
दोउ रस सिन्धु मगन रस लम्पट अग्रअली नहि चाहत भोर ॥

भूमकि २ ललि लाल कि नटनियां ।

निरखि २ अलि हिय कसकनियां ॥

बाजत मृदक बीण सारंगी तमूर भीन अलगोंजा वंशी—
वाजै वाजत पैजनियां ।

मृगों नाचै चन्द पर शेष नाचै शम्भू पर कवि नाचै बिम्ब-
पर मनके हरनियां ॥

कर सोह कर धरे थिरकि २ अलि ताताथेई २ ताथेई कहनियां ।

नवल अली की लली बन्धकि वंधनियां रसिक शिरोमणि—
सोरस कि पियनियां ॥

श्री अग्रपद (६४) प्रीतम का गान प्यारी तेरे नयना मदनसर वारी ।

रतनारी कारी कजरारी चन्द्र वदन पर अति छवि धारी ।

चितबनि बांकी तिरछी प्यारी ममहिय के घायल करि डारी ।

मीन कमल खंजन दुति हारि सब विधि प्राण आधारहमारी ॥

हंसनि नटनि अरु अंग मरोरनि देखि २ में जाउ बलिहारी ।

रूप उजागरि अग्र तियन में हौ तुम श्री मिथलेश दुलारी ॥

श्री अग्रपद (६५) प्यारी का गान प्यारे मुखचन्द विलोकहु सजनी ।

क्रीट मुकुट मकराकृत कुण्डल नयन कमल दल अति छवि छवनी ।

नाशामणि सु अघर पर राजत मनहं कमल दल शुक्र उदवनी ।
कल कपोल पर अलकै खूटे चन्द उपरमत्त वशि बहु अहिनी ॥
कटि कछनी काछे बने आछे पग में तूपुर अति मन हरनी ।
मुरनि दुरनि अरु हंसनि नटनि में कोटिन काम करों निवछवनी ।
रूप उजागर अग्र स्वामि मेरे मम हिय के है प्राण सुजिवनी ॥

श्री अग्र पद ६६—सखी का गाना— रागकल्याण बलिहारी सीता बदन की ।
उज्ज्वल अरुण परस्पर दीपति अधर बिम्बफल रदन की ॥
वेशर मुक्ता चपलहोत अति शोभा बीरी अदन की ।
लोचन चारु चितै मधुवर्षत राम काम दुख कदन की ॥
सची सहित शोभा त्रिभुवन को बारों भामिनि मदन की ।
अग्र स्वामिनी विशद चन्द्र मुख सौभग हृद् सुख सदन की ॥

प्यारी का गान

लाल तुम कर धरि वीण बजावो मै भरि कण्ठ अलाप—
रूचारों तुम स्वर संग मिलाओ ।

मै प्यारी कहि गाऊं तुमको तुम प्रीतम कहि गावो ।
मैं रघुनन्दन नाम धरों निज तुम सिय प्यारी कहावो ॥
कटि लहगा शिर धारि चन्द्रिका मोहि कछु नाच दिखाओ ॥
मैं करताल बजाउ रंग भरि तुम हंसि हाव दिखाओ ॥
मैं करजोरि मनाऊं तुमको तुम कसि भौंह खिसाओ ।
मैं सौन्दर्य सराहि परो पग तुम दंसी कण्ठ लगाओ ॥

श्री अग्रपद (६७) आकरण्यो जहं तहं नर नारी ।

सब सखियन मन पिय अंग धारी करों मनोरथ रुचि अनुसारी ॥
सबके रुचि लखिके सिय प्रीतम धार चो बहुत रूप मनहारी ।
जस र जाहि मनोरथ रहेऊ तस तस करि सब कियो सुखारी ॥
अस्थावर जंगम जो जहं लौं आनन्द मुरछा में नर नारी ।
अद्भुत रास रच्योपिय प्यारी संग सखिन लिये अग्र दुलारी ॥

श्री अग्रपद ६८ रसिक दोऊ सरयू कूल चले—

रास श्रमित है संग सखिन लै दम्पति दियभुजगले करन—
लगे जलकेलि विविध विधि दोऊ रस रंग रले ॥
प्रीतम डूवि प्रिया पद गहिके ऐंचि लेत जल तले ।
प्यारी कर कमलन ताडन करि जल पिये आंखि दले ॥
प्रीतम के गति भूली गये सब दोउ कर आंखि मले ।
काहू के कटि बसन छोडि पिय तट पर आय चले ॥
वह सखि ने अति लाज श्रमित है जल से नहि निकले ।
पुनि सिय ने पिय से पट लैके दइ सखि हाथ तले ॥
करि जल केलि प्रिया प्रीतम दोउ जल से आय थले ।
करि शृंगार अग्र सखियन युत आय गये महले ॥

श्री अशोक वन

श्री अग्रपद ६६ श्री सरयू तट बन अशोक मधि रास रच्यो श्री अवध बिहारी ।
 चहुं दिशि मणिमय कोट बिराजै मध्य कुंज बहु न्यारी न्यारी ॥
 ताके चहुं दिशि पादप राजै त्रै सम्पति युत अति रुचि कारी ।
 ता आगे बहु लता कुंज है जाति २ के न्यारी न्यारी ॥
 ताके चहुं दिशि कृत्रिम पादप जाति २ मणि के छवि कारी ।
 ताके चहुं दिशी गमले सुन्दर बहुत भांति के धरयो सुधारी ॥
 ताके चाहुदिसि मोतिन भालर मध्य में रचना बहुत प्रकारी ।
 मध्यभूमि बहुरंग मणिन के वेली बुटी विविधि प्रकारी ॥
 तापर जाजिम स्वेत बिछे हैं चन्द्र किरनि के अति छविहारी ।
 तामघि सिंहासन अतिसुन्दर स्वेत मणिनमय अति सुठिकारी ॥
 ता पर बैठे युगल बिहारी श्रीनृपनन्दन जनक दुलारी ।
 गौरस्याम छवि को कबि बरनै कोटिकाम रतिदुतिलखिहारी ॥
 प्यारी के तन सुध सुसारी प्यारे अंग जामा भलकारी ।
 प्यारे उर मोतिन की माला चन्द्र हार सोहत उर प्यारी ॥
 कण्ठ पोत प्यारी गल राजत पिय गल गोप विचित्र सँवारी ।
 बाहुन में अंगद सुठि सोहैं कर में पहुँची अति दुति कारी ॥
 कर्ण फूल प्यारी श्रुति शोभित पिय श्रुति कुण्डल मकरा कारी ।
 प्यारि के शिर मणिन चन्द्रिका पिय शिर क्रीट भानुमदहारी ॥
 बिमलादिक सखि चहुं दिशि सोहैं मध्य नटनलागे पिय प्यारी ।
 कोई सखि बीणा मुचंग काहू लिये जलज तमूरा कोई २ धारी ॥
 बहुत सखी लिये बहुत यंत्र हैं थेई २ कर नाचत बहु नारि ।
 छम २ नूपुर चरनन बाजै मनुमोहनी मंत्र ध्वनि कारी ।
 मावति सब रागन रागिनि में स्वर सुनि इन्द्र बधू मनहारी ॥
 जब प्यारी प्रीतम मिलि गावत ताथेई २ औरन प्यारी ।
 स्वर्गसात पाताल व्यापि गयो परमानन्द के बह्यो पनारी ॥
 महारास सब दिशि में छायो आकरण्यो जहं तह नर नारी ।
 सब सखियन मन पिय अंगधारी करां मनोरथ रुचि अनुसारी ॥
 सब के रुचि लखि के प्रिया प्रीतम धारयो बहुत रूप मनहारी ।
 जस २ जाहि मनोरथ रहेउ तस २ करि सब कियो सुखारी ॥
 अस्थावर जंगम जो जंहलों आनन्द मुरछा में नरनारी ।
 अद्भुत रास रच्यो पिय प्यारी संग सखिन लिये अग्र दुलारी ॥
 आज सखी लखु रास मण्डल में नृत्यत हैं रसरंग भरे ।
 बन अशोक सम भूमि खचित मणि रवि शशि अमित प्रकाशकरे ।
 श्री रघुनन्दन जनकनन्दनी अमित मदन छवि अंग धरे ।
 क्रीट मुकुट चन्द्रिका मनोहर भूषण अंग २ नगन जरे ॥
 कुण्डल मकर हार मोतिन के वैजन्ती बन माल गरे ।

नाशा मणि भूलत अघरन पर केशर चन्दन खोर करे ॥
 मोतिन मांग भरी वर वेनी कुटिल अकल जनु भ्रमर खरे ।
 मणि कंकण पहुँची कर चूरी बाजू बन्द जराउ जरे ॥
 नीलपीत पट लसत दोउन अंग स्याम गोर मिलि लगत हरे ।
 किकिनि मुखर अरुण कर पल्लव पग नूपुर भन कार करे ॥
 थेइ २ करत भरत स्वर अलिगन निरतत पिय संगअनंदभरे—
 वजत मृदंक ढोल सारंगी भांभ मजीरा वीन वरे ॥
 युग २ सखिन वीच रघुनन्दन करसों कर धरि लसत खरे ।
 करि मण्डल निरतत सखियन संगनिरखि मदन बहु मुरछि परे ॥
 पूरि रह्यो वन मण्डल सोरस अचर सचर चर अचर करे !
 सुर मुनि अगम सुगम रसिकन को रसमाला यह ध्यान धरे ॥
 सांवरे सलोने जु भूमकि भुकि आवैरे ।
 सरद कि रैन पिया अधिक सुहावैरे ॥
 मन्द मुमुकाय प्यारी जू के गल बांह दिये,
 उँचेस्वर तान ले मधुर स्वर गावैरे ।
 रहस मण्डल आली संग लली कर धरि,
 छम २ छननन नूपुर बजावैरे ॥
 कटि लच कनि ग्रीव मुरनि धुरनि नैन,
 कुराडल हलन मनि क्रीट भलकावैरे ।
 नवल बिहारी प्रिया लली संग रस बस,
 अलि संग लता कुन्ज मन ललचावैरे ॥

नटत सियाजू पिया लेत बलि हरिया ।
 छम छम छमकत नूपुर बाजत पिय,
 मन मोहति कहतहरि हरिया ॥
 चम्प फूल पर घन सोहत छवि,
 तापर नखत दामिनि फुलभरिया ।
 लेत तान जव प्यारी नइ नइ,
 बाह २ कहत पिया जु स्वरभरिया ॥
 नवल बिहारी पिया विरिया खिलावत,
 जय २ कहत सखिन मन हरिया ।

नटत छवीलै छैला सिया मन हरिया ।
 जव धूमत पिय बागा फहरत,
 सियामन कहरत मदन लहरिया ॥
 कम्पत चलत पसेवनि अंशुवा,
 उमगत मनहु सावन कि नहरिया ॥

गिरि - २ लेत पिय तान अलापत,
 मुरछि परत सखिसिय थर हरिया ॥
 नवल विहारी प्रिया पिय रस लूटत,
 प्यारी पर छिरकत चन्दन फुहरिया ।

नटत छवीले छैला सिय मन हरिया ॥
 जब पिया घूमत बागा फहरत,
 सियामन कहरत मदन लहरिया ।
 कम्पत चलत परसेवनि अमुवा-
 उमगत महु सावन कि लहरिया ॥
 गिरी २ लेत पिय तान अलापत-
 मुरछि परत सखि सिय थर हरिया ।
 नवल विहारि प्रिया पिय रस लूटत-
 प्यारी पर छिरकत चन्दन फुहरिया ॥

आज जनक दुलारी रसरंगन भरी ।
 चम्प के वरनवारी वसन मुरंग वारी-
 वदन मयंक वारी रूप अगरी ॥
 अरुण अघर वारी बोलनिमदुर वारी-
 तिरछि चितौनी सर मारति खरी ॥
 वेसर सुपास वारि भुजन मृणाल वारी-
 उरज उत्तगवारी मदन जरी ॥
 मोतिन के हारवारी मध्य छीण वाग वारी ॥-
 जघन गम्भीर वारी भावन भरी ।
 गमन मराल वारी तूपुर भनकार वारी रसमाला
 उर वारी मह्यो मन री ॥

जाजवन्ती दादरा-
 कित गयो मेरि आली रास को रमैया ॥
 सांवरो छविलो छैलामेली २ कण्ठभुज,
 मोठी २ बातें-कहि हिय को हरैया ।
 एक सखि आगे २ आप वाके पाछे २-
 कुंजन प्रवेश कीनो हमहुं लखैया ॥
 माइ वाप गौरे २ भाई वाके गौरे २-
 आप कारो २ वारो फन ज्यों डसैया ।
 मोको तो नसूभै कछु बूझै न विकल भई,
 सावरे की छवि हिय विच करकैया ॥
 आंसुवन भीजै मेगी अंगिया उतारो सखि,

हार को बहाबो कहा सुख के देवैया ।
 तियन पिकल जानि आये अघुलाल पिया,
 डबत बिरह वारी पाये सुखनैया ॥
 आरति उतारै सखिबारै तन मन धन,
 जनक लडैती संग राजै मुद छैया ।
 कोउभरि अंक कोउ बदन भयंक लखि,
 कोउतिय कहैं पिय बड़े निठुरैया ॥
 रसिक अलि के प्रान प्यारे रघुलाल ॥ सिया—
 खेलत नवल रास मण्डप दिपैया ॥
 पिया हिया लागि रहो न्यारे जनि जाउरे ॥
 गुरुजन के लाज काज हेरो जनि भोरे पिया—
 सुमन के सेज सिया रस वश छाउरे ।
 पइयां परो तोहि में तो निशिपति निशदिन—
 राकाधुत नित हित अबध शाउरे ॥
 कुल गुरु नीत हम पूजन सु करि हैं—
 उदैजनि होउ में तो दुःख हियापाउरे ।
 नवल बिहारी पिया बिछुरत संग प्यारी—
 मरनोसो भलो जिया जनि तड़फाउरे ॥
 कर धरि सिया नटै पिया मुख हेरि हेरि ।
 चहुं दिशि अलिगन छम छम छमकत मन्द मुसुकनि में
 मदन रस भरि भरि ॥
 फहरत बसन हुगन्ध छहरत अति
 तोती माला टटत सखिन उर वेरि वेरि ।
 उरज गहत कर अघर चूमत जब
 पूचत रसीली बातै आली मुख हेरि हेरि ॥
 नवल बिहारी प्रिया नूपुर के सोर सुनि,
 पिय रस लूटत बांधत बन्ध वेरि वेरि ।
 धिधि केटे धिधि केटे बाजत मृदंग ॥
 स्वरनि भरत उघटन तेथे तत्ता थेई,
 लाग डाट सम तान तरंग ।
 चारनि चरनि उर भावनि,
 दृग मोरनि तस चलनि उमंग (सुअंग) ॥
 रसिक अली रघुबीर सांवरो,
 नटत अटत मुनि उरनि अनंग ।
 राग परज—राजदुलारी रस में रोस न कीजै ।
 बदन सरोज नवल रिस कीन्हें, कला, उन लखि लीजै ॥
 अमित कला वर बदन सांवरो चन्द्र, हंसनि कत दीजै ।
 रसिकअली प्यारी रघुवर की, हंसि प्यारो रस भीजै ॥

दोहा—धन्य चारुशीला अली चतुराई की खान ।
 पिय प्यारी की प्रान सी तुरत छुड़ायो मान ॥
 रीझि रहे राघव हिये तनमन अरप्यो तोहि ।
 ताते पद गहि रसिक अली नित्य समाज समोहि ॥
 दिन २ दिन रस बढ्यो रीति अलि जानि पियाकी ।
 तेरे बश पिय भये हो श्रीचारुशीलाजू ॥
 सब रस ऐनी आहि भूपटि पिय राम मिलाजू ।
 मिले राम पिय सत्य अब शंशय मन मति राखु ॥
 रसिकअली की स्वामिनि बुद्धी, बानि सुभाषु ।

श्री अग्रपद ७० मूदत नैन राम सीता के चन्दा तन चितवन नहि देत ।
 मागै जो वल्लभा मृगन को सारंगधर सकुचत यहि हेत ॥
 प्रिया वचन उल्लंघ सकै नहि उडुपति हते प्रलै ह्वै जाय ।
 दोऊ कठिन जानि रघुनन्दन हांसी मिस यह रच्यो उपाय ॥
 जाचै जो जानकी कदाचित इन्दु कुरंग वेगि देउ आनि ।
 अति आधीन जनावत तिय के अग्र स्वामि याते यहमानि ॥

श्री अग्रपद ७१ रूठो जी राम गुशांइ भले २ ।
 पायो राजपाट दशरथ को गहि लीनी ठकुराइ ॥
 जाय कहू मिथिलेश ललोजु से, निकश जाय गुमडाइ ।
 अग्रअली के शिर पर चहिये श्री शिरध्वज की वाइ ।
 कवित्त— जाय कहू मिथिलेश लली से आज अवै निकसै गुमडाई ।
 भोर सुभाय सुनैगिजबै मन मान ले एँ ठि छिपेँ कहूँ जाई ॥
 मेरे बिना फिर मान टरै नहि कोटि करो पिययो चतुराई ।
 ताते कहूँ अबहूँ सुनि लो सोन्दर्य गुमान किये न भलाई ।

दोहा—प्यारी तू प्यारी अहैं सुधर सुधारी रूप ।
 मोते बोलि न आब अब परों प्रेम तव कूप ॥
 रसिकअली पिय उर लगी प्रीतम लई लगाइ ।
 गये अपनपौ भूलि दोउ या तो प्रेम सुभाइ ॥
 रसिक दोउ नृत्यत रंग भरे ॥
 विपिन अशोक रास मण्डल बिच,
 जनक लली रघुलाल हरे ॥
 अमित रूप धरि करि कछु चेटक
 युग युग तिय मधि श्याम अरे ।
 क्रीट मुकुट की लटकि चन्द्रिका
 भुकनि मदन मद दूर करे ॥
 मोँतिन हार युगल उर राजत कुन्द मालती माल गरे ।
 पग तूपुर मजीरमधुर धुनि कंकन किकिनि मुखर तरे ॥
 मुरज मजीरा ढोल सारंगी अरु मुरली के टेर करे ।

विविधि ताल संगीत अलापत ततथेइ २ कहत खरे ॥
 कबहूँ मधुर मुसुकाय के दम्पति निरखत छवि भजअंशधरे ।
 कबहूँ सुरति करि व्याह समयकी फिरति भांवरीरसिक बरे ॥
 यह रस रास महासुख सागर द्वादश योजन लो सवरे ।
 रसमाला भरि पूरि रही वन जग कोइ बुन्द प्रकाश करे ॥

अवधपुर महिमा

देखत अवध को आनन्द ।
 हरषि वरषत सुमन दिन २ देवतनि को वृन्द ॥
 नगर रचनाशिखन को विधि तकत बहु विधिबन्द ।
 निपट लागत अगम ज्यों जल चरहि गमन सुछन्द ॥
 मुदित पुर लोगनि सराहत निरखि सुखमाकन्द ।
 जिन्हके सुअलि चख पियत राम मुखारविन्दमरन्द ॥
 मध्य व्योम विलम्बि चलत दिनेश उडुगण चन्द ।
 रामपुरी बिलोकि “तुलसी” मिटत सब दुख द्वन्द ॥

विवाह लीला विहार

दोहा—लीला विविध विनोद मे, पुरुष रूप सखि कीन्ह ।
 जेहि सेवा में जश चरित, तशकरि प्रिय सुख दीन्ह ॥

श्री अग्रपद ७२ प्रभु जी हमको आज्ञा दीजै ।
 यज्ञ पूर भयो पुण्य तुम्हारो नृप को दर्शन कीजै ॥
 सुनहु आज मिथिला पुर तें इक आयो है परचारी ।
 सीय स्वयम्बर अखिलनरे श्वर कौतुक ह्वै है भारी ॥
 पंगति रथ ऐ है पुनि बहु तहं ह्वै है बडो समाज ।
 अग्रस्वामि दोउ हंसत कुंवर बर संग चले ऋषिराज ॥

श्री अग्रपद ७३ सखि में सपनो सुन्दर पायो ।
 इन्दु वदन राजिव दल लोचन गाधि सुवन संग आयो ॥
 स्माम वरन तन कोटि भानु दुति शोभा सब जग छायो ।
 मोद भयो मिथिलापुर बासी मो मन अधिक सिरायो ॥
 रघुकुल कुवर अयोध्या नायक भुजबल धनुष चढ़ायो ।
 नृप सब सभा ठगी सी ठाडी गर्मिन गर्भ नशाओ ॥
 पूरण भयो पिता प्रणमम सखि सब सन्देह नशायो ।
 अग्र स्वामि अरविन्द बन्धु उदै मिलि है पति मन भायो ॥

श्री अग्रपद ७४ रागमारु अरी हो राम रग रची ।

तात हमारो पन कियो तोरन घनप कठोर ॥
 कोमल करतल सांवरो सखि मूरति मधुर किशोर ।
 राजशभा ऐसे भई ज्यों उडूगनमें चन्द ॥

विघना विधिसो निर्मयो अलि मोहन मनको फन्द ।
लोक वेद की लाज सखीरी यद्यपि दुस्तर आहि ॥
रूप निधान देखि रघुनन्दन धीरज धीरज नाहि ।
ऐसी मो जिय उपजीरी चाप चढ़ाओ कोइ ।
अग्र स्वामि के हाथ बिकानी होनी होय सो होइ ॥

श्री अग्रपद ७५ रागमारु सखी मोहि राम रूप भावै ।
नृपति निकर निरस सब लागै कोउ दृष्टि न आवै ॥
उड़गन उदये होत ज्यों आली चकोरो चैन न पावै ।
एकहि अमृत श्राव उदये ते चन्दा तपनि बुझावै ॥
राजा बन राजी से लागत पोरुष नहि दर्शावै ॥
रघुनन्दन चन्दन द्रुम मानों अन्तर जरन जुडावै ॥
भावै नही पितापन सजनी सारंग पानी सुहावै ।
अग्र स्वामि मोहनी मन्त्र लिये चितवत चितहिचुरावै ॥

श्री अग्रपद ७६ रामकान्हरौ तात प्रन काहे को कियो ।
कठिन पिनाक रामकर कोमल धीर न घरत हियो ॥
मधुर मूर्ति आनन्द कन्द सम नाहिन और वियो ।
वक्र चितवनी सांवरे सखि चिन बित चोर लियो ॥
रघुपति तजि जे करै आन रति धिग २ जीव जियो ।
अग्र स्वामिरस वश भइ आली मो मन मोललीयो ॥

श्री अग्रपद ७७ होरीताल-येरी मै हूंगी अनुरागि चरण की ॥
अंकुश कुलिश कमलध्वज चिन्हित अरुण वरण अध-
तिमिर हरणकी ।
जो पद परसि सरस दुर्लभगति होत भई ऋषिराज घरणिकी ॥
नृपुरनदन मदन सुनि लज्जित राजत जीवन रसिकजननकी ।
अग्रअली सोइसुभग सरोरुहनेखत कान्ति मणि माणिकबरन ॥

श्री अग्रपद ७८ सौमित्रिकहे सुनहु श्याम घन, हूं जानत वदेही को पन ॥
राजन कीयहु रीति वाम बहु दाशन लिखि नहि आवै ।
यह डर निडर जानकी रघुपति रामहि ह्यदे बसावै ॥
राजिव नैन अनुज के वैन सुनि ताको यश सब जान्यो ।
यक पतनी व्रत लियो रीझि कै अग्र भूमि धरिपान्यौ ॥

श्री अग्रपद ७९ जब रघुपति कर धनुष उठायो ।
पुलकत तन रोमाञ्च गाधि सुत पुरति प्रेम भरि आयो ॥
को बड़ नमिन न मुख भूपति कर जानकिमन तरसायो ॥
तोरयो चाप सभा में तिहि क्षिणि संशय सबै नशायो ।
मगन शब्द सुनि जामदग्नि मन अहंकार सुवहायो ।
तोषे अमर अवनिजनु फनिपति अग्रदास मनभायो ।

राजति राम जानकी जोरी ।

स्याम सरोज जलद सुन्दर वर दुलहिनि तड़ित वरन तनु गौरी ॥
 व्याह समय सोहति वितान तर उपमा कहुं न लहति मति मोरी ॥
 मनहु मदन मंजुल मण्डप महँ छवि शृंगार शोभा इक ठोरी ॥
 मंगलमय दोउ अंग मनोहर ग्रथित नूनरी पीत पिछोरी ॥
 कनक कलश कहँ देत भांवरी निरखि रूप शारद भई भोरी ॥
 इत वशिष्ट मुनि उतहि सतानन्द वंश बखान करै दौउ जोरी ॥
 इत अवधेश उतहि मिथिला पति भरत अंक सुखसिन्धु हिलोरी ॥
 मुदित जनक रनिवास रहस वश चतुर नारि चितवहि तून तोरी ॥
 मान निशान वेद ध्वनि सुनि सुर बरषत सुमन हर्ष कह कोरी ॥
 नैनन को फल पाइ प्रेम बस सकल आशीशत ईश निहोरी ॥
 “तुलसी” जेहि आनन्द मगन मन वयो रसना बरनै सूख सोरी ॥

पाणिग्रहण

श्री अग्रपद (८०) मंगल आज जनकपुर माही ।

पाणिग्रहण सीता रघुपति को नरनारी सब फिनि उछाही ॥
 मण्डित द्वार चौहटा बीथिन दिव्य दुक्कलनि धाम उछारै ॥
 अति आतुर पग लागत न अवनी कहुं गज कहुं रथ अश्व शृंगारे ॥
 शीश सेहरो रामचन्द्र के अंग वानी करि तोरन लाये ॥
 रुक्म पुहुप मुक्ता ले गोखनि नबल वधू अंजलि वरषाये ॥
 मण्डप तर बैठाय पटा दोउ वेद बिहित सब कर्म कराये ॥
 साखोंच्चार दुहुं कुल गुरु करि कुंवरि कुंवर को हाथ गहाये ॥
 उतरासन की ग्रन्थि परस्पर दृढ़ वचननि बाँधैं अंग लीन्ही ॥
 आगे प्यारी पीछे प्रीतम जातवेद कल भांवरि दीन्ही ॥
 भूरि दान दे तोषि सकल सुर दुलहिनि संग भीतर बैठाने ॥
 परदा ओट समागम पहिली “अग्रदास” दासी सुख जानैं ॥

दुलह राम सिया दुलहीरी

घन दामिनि वर वरन हरन मन सुन्दरता नख सिख निवहीरी ॥
 व्याह बिभूषण वसन बिभूषित सखि अवलि लखि ठगि सिरहीरी ॥
 जीवन जन्म लाहु लोचन फल है इतनोइ लह्यो आज सहीरी ॥
 सुखमा सुरभि शृंगार क्षीर दुहि मथन अमिय भय क्रियो है दहीरी ॥
 मथि माखन सियराम संवारे सकल भुवन छवि मकहु महीरी ॥
 तुलसीदास जोरी देखत सुख शोखा अतुल न जात कहीरी ॥
 रूप राशि विरची विरची मनो शिला लवनि रति काम लहीरी ॥

शोभित सीताराम कनक मण्डप तरे ।

शिर सोहैं सोने को मौर मञ्जु मुक्ता जरे ॥

परसत अमल कपोल सुमुक्ता कोर के ।

राजिवलोचन लोल कमल मानो भोर के ।
 सुरंग चूनरी के निकट पीत पट छुई रह्यो ।
 मनहुं अरुन घन मध्य चपलता चुई रह्यो ॥
 सिय मूषण प्रतिबिम्ब राम छवि उर धरे ।
 मनहुं जमुन जल मध्य दीप दीपक वरे ॥
 राम भुजा के निकट सीय भुज यों लसै ।
 मरकत मनिकर खम्भ मनहुं कंचन कसे ॥
 राम भये घन श्याम सिया भइ दामिनि ।
 मुनि भये चन्द चकोर चकित भइ भामिनी ॥
 राम भये तन गौर सिया भइ सांवरी ।
 सारद सी बुद्धि वन्त वधू भइ बावरी ॥
 पुष्पन वर्षत मेघ मेदनी थर हरे ।
 होत जनकपुर ब्याह राम भांवरी फिरे ॥
 राम सिया को ध्यान सदा शंकर धरे ।
 ब्रह्मा रूप निहार इन्द्र पूजा करे ॥
 यह छवि युगल किशोर ! सुमुनि जन ध्यावहि ।
 लखि लखि विमल विनोद वेद यश गावही ॥
 तुलसी सीताराम सदा उर आनि थे ।
 राम भजन बिन जन्म वृथा करि मानिये ॥

गोरी किशोरी दुलहिया हे दुल्हा राधो जि स्याम ।
 देखे के पँवलो सँजोगवा हे बशि के येहि गाम ॥
 लाली ललीकी चुनरिया हे अंग ललित ललाम ।
 कटि में कसे वे केशरिया हे कोरन जरिकाम ॥
 मौरी मणिन इन धरिया हे सिन्दूर सुख घाम ।
 उन शीर टेडी बगडिया हे मौर मोतिन दाम ॥
 दोऊ कि दोउ नजरिया हे हिय करै कतलाम ॥
 कोन इन्हें लखि सखिया हे विकिगै बिनु दाम ॥
 प्रेमी जनों के पियरवा हे सन्तन विसराम ।
 मोद बशाले हिरवाहे मुख दम्पति नाम ॥

श्री कोहवर बिहार

श्री अग्र पद ८१

रागकल्याण—लाल भयो रोमाञ्च प्रिया को आगम जान्यो ।

अनगरौर गये दौरि अजिर में

अति आतुर है अंग राम पहिचान्यो ॥

मेंघागम ज्यो नृत्य कलापी नूपुर घुनिमन मान्यो ।

सुख समाज सो मिली अग्र प्रभु तन मन एकता सान्यो ॥

श्री अग्र पद ८२

हिम ऋतु हर्म गर्म मनि को है ।

कीम खाप मखमल गिलमन्ह पर सिय पिय परिकर सोहै ॥
लै कोउ बीण प्रवीण सहचरी राग तरंग उमगो है ।
अग्र स्वामि सुख निधि सोता पति रमि रमाय मन मोहै ॥

श्री अग्र पद ८३

तहन तमाल वरन रघुबीर, जानकि कंचन की लता ।
सौ दामिन नव घन संग मानहुं पुलकित प्रेम मता ॥
निरखत रेख जम्बूनद जैसे दोऊ रंग रता ।
अग्र अली सीतापति शोभा को करि सकै अता ॥

श्री अग्र पद ८४

भूषण मन में नाहिन भावत ।

सीत भीत पीय अंग परषत ऋषि पतनी की सुधि जब आवत ॥
जम्बूनद गुहि असित पाट सों नाना भातिन स्वकर बनावत ।
कुसुम कटाव कंचुकी सारी कुंकम कुचन सु दोष जनावत ॥
पद्म पानि पद चित्र महावर पांति तम्बूल कज्जल छवि पावत ।
सहज सुभग वैदे ही अंग २ अग्र स्वामि यहि भांति रिभावत ॥

कलेऊ बिहार

रघुबर जेवत जानि एक सखि अँचल दै हंसि बोली जू ।
सुनहु लाल तुम काके जाये सत्य कहो सब खोली जू ॥
सुनहु प्रिया हम नृप दशरथ के जासु सुयश श्रुति गावै जू ।
भूपति गौर स्याम तुम लालन हम कैसे पतियावै जू ॥
सुनहु चतुरि हम स्याम न होते को शृंगार रस ज्यावै जू ।
हमरे श्री जनकलली रस की रस बिन बोले पिय आये जू ॥
कहहु कमल मकरन्द मधुर हित भँवरहि कौन बुलावै जू ।
रामचरण सुनि मरम मधुर रस सब सखियां मुसुकावै जू ॥
सुनिये श्रीरसिकराय रघुनन्दन सीति प्रीति रसमारी जू ।
तुम तो स्याम स्वामिनि मम गौरी यह अचरज अति भारी जू ॥
जो पै लाल आप रुचि होवै तौ हम बात बिचारी जू ।
कछक काल मिथिला में रहिये होई नागरी सुकुमारि जू ॥
श्री लक्ष्मिनिधि के मंलो में रहिहौ रूप उज्यारी जू ।
मन भावती टहल प्रभ करिहौ श्रीसिद्धि की अनुहारी जू ॥
तव प्रभु गौर बदन तुम पैहौ सियस्वामिनि अनुहारी जू ।
हंसि २ कहत परस्पर दम्पति कामदेन्द्र बलिहारी जू ॥

तुम सकुचत कश चित चोर दुलहा राम लला ।

जैवो व्यजन रुचिर हमारो व्यंग बचन सुनिमोर ।

तुम तो स्याम काम छवि लाजै मातु पिता कैसे गौर ॥
गारि ससुर पुर सुनि रघुनन्दन हँसै सु लखि मुखमोर ।
कृपा निवाश हरषि सखि गावै जुरि रसिया जुकि ओर ।

राम में छवो रसन कि छटा ।

बचन मधुर अरुमाधुरि मूरति तुव रवि रस कोजटा ॥
रुचि कारक लावण्य लवण रस तीष नेज रिपुडटा ।
बाहर भीतर अमल करत जो इहै अमल रस ठटा ॥
प्रभुयश तीत अभागी नाही कोहै अति अटपटा ।
जैसे मधु में सब रस छाये मधु अमृत से सटा ॥
“मधुवाता” इति श्रुति में सोमधु बहुत भांति से बटा ।
रस से मोद मोद से जीवन महं रसिकन अश अटा ॥
महादेव नीके जानत जिन राम राम नित रटा ।

अचवन करत राम सिय प्यारी ।

स्यामा पान लिये कर ठाढ़ी रामा लिये जल भारी ॥
च द्रवती खर्चा दर्पण लिये चन्द्रकला सुकुमारी ।
सुभगा लिये वागो प्रीतम को सहजा लिय सिय सारी ॥
करि अचवन बैठे सुख आसन सकल जनन सुखकारी ।
राम सखे बलि र दम्पति छवि सुन्दर वदन निहारी ॥

सखियन बीरी सरस सम्हारी

नागर दल सुकपूर चुना कुटि सुख प्रद लोंग सुपारी ।
दालचिनी सुचुनी वर मेवा सुघर समय अनुसारी ।
मनकी जानि स्याम कर दीन्ही स्वकर खवाबत प्यारी ॥
अघर दशन रसना की उपमा खोजि र मति हारी ।
कृपा निवाश अली सिय पिय की अधरामृत अधिकारी ॥
वीर तुम धीर मुनीशन गाये, आज सखियन हाथ ठगाये ॥
सुनियत मारि ताड़ का पापिनि ऋषियन शोक भगाये ।
दलि मारीच सुबाहु सहित दल तिहुपुर सुयश जगाये ॥
शिला नारि भइ परसि चरण रज गयो सुहाग मंगाये ।
सियकर कंकण छूटन नाही बातन मनहि पगाये ॥
जनि सकुचाहु प्राण धन जीवन सुनि हंसि कण्ठ लगाये ।
ज्ञाना अलि सरहज की बातै सुनि र अति मन भाये ॥
ललन ससुरारि छांड़ि कहै जैहो यह सुख कतह न पैहौ ।
शाशु शशुर सारी सरहज सब मिथिला विरह सतैहौ ॥
मानि ननद नाते ननदोई फिरि विधुबदन दिखैहौ ।
प्रमदावन भूलेहु जनि रघुवर निजकर पतिया पठैहौ ॥
जो तुम सांच अवध नृपदन्दन सांचि कहौ कब ऐहौ ।
ज्ञाना अलि तब शफल मनोरथ जब हंसि कण्ठ लगैहौ ॥

बसंत पंचमी

श्री अग्र पद (८५)

आज बसन्त पंचमी पूजा श्रीरघुबर की बधाई ॥

कनक कलस सजि भरि धरि शिर पर आम ओर जब ल्याई ।
चोवा चन्दन और अरगजा मोतियन चौक पुराई ॥
रतन जटित पिचकारी कर गहि केसरि रंग भराई ।
तकि २ मारत श्री रघुबर को अबिर गुलाल उड़ाई ॥
श्री रघुबर सिंहासन दैठ निरखि २ सुखपाई ।
छोड़व छिरकब भरव परस्पर ऐसी खेल मचाई ॥
नवल बसन्त नवल मोरन वन नवल नवल मन भाई ।
अग्रदास गावहि श्रीरघुबर फगुआ परम्पद पाई ॥

श्री अग्र पद ८६

डफ बाजी जनक दुलारी की ।

चहुं दिशी सखि जड़ाउ छड़ी लिये पिचकाकर अवध बिहारी की ॥
मारा मारा मची कुंजन में, छाड़ अविर अंधियारी की ।
यह छवि देखि मगन सुर मुनि भये अग्र अली बलिहारी की ॥

थिरकत आबै लखी गोरिया ।

लाला भागि चलो यहि औसर ना चलिहैं बरजोरिया ॥
लपटि भपटि गहि एक एकन कहदश रकरै होरिहोरिया ॥
कोविद नारि गई रानी ढिग फगुवा देवी तव छोरिया ॥

होरी जनक लली संग खेलत राजकुमार ।

अविर उड़ावत धूम मचावत गावत राग धमार ॥

मलि गुलाल मुख चूमि लेत हंसि अवध छयल दिलदार ।

मोहनि अली प्रेम में दोउ सुधि बुधि दीन बिसार ॥

रंग डारो न मो पै धनु धारिलाल ॥

जो मोरि सारी पै रंग परैगो तौ तौहि देउंगि गारि लाल ॥

तुम्हारे संग रघुवंशि छैल सब मोंहि संग सखियां हजारिलाल ॥

रामप्रसाद श्रीसिया प्रसाद तें कबहुं नही मै हारिलाल ॥

पिय लखु आलियां फागु रस माती ॥

मति मानो अवला अति चपला भरि है सकल करामाती ।

ठहरिय छिनक टरिय जिन इत ते जुटि जै है पांति के पांति ॥

व्यंग सुबचन सुनाई हंसि २ नारि वनैहै भलि भांति ।

अजु चहो कुशल तो छोड़ो रघुनन्द (कहि) प्रेम भरी मसुकाती ॥

रसिया को नारि वनाउगी ।

कटि लंहगा उरमाह कंचु कि चुनरी शीश उठाउंगी ॥

गाल गुलाल दृगन में अनजन बिन्दी माल लगाउंगी ।

सियाअवी ताली वजायकर स्वामिनिनिकट नचाउंगी ॥

नव नागरि वाल बने रसिय ।

दृग अंजन खंजन रतनारे तकनि तीर वांकीगंसिया ॥

वैदी भाल विशाल विराजै नथ वेशर लटकन लसिय ।

कंचन कुंवरि स्याम तन सारी धुंधट पट मुख छविशशिया ॥

वाह २ रे अवध नृपति छोरी ॥

खूब बनी नव वधू दुलहिया गूंधट पट किन खोलोरी ।

स्यामा वाम सुरूप वति तुम दुलह तुम्हारे को भोरी ॥

चटक चूनरि बर छोटी को लंहगो नथ वेशर तिय मणि होरी ।

वेदी भाल विशाल नयनि सिन्दूर मांग दृग आंजोरी ॥

सिय जू चरण पड़ो बर पैहौ नर भूषण पिय चित चोरी ।

यह सौन्दर्य निरखि जग को है जो नहि तुमने मोह्योरी ॥

भीने रहो रंग भीने रहो दोउ ।

यह रंग भीनी छवि अखियन की प्रीतग नित २ देते रहो ॥

आपरंगो रंग डारो हमन को हमसे भीरंग लेते रहो ।

सिया अलीयह रंग की बधाई मोहि मुख बूमपन देते रहो ॥

श्री अग्र पद (८७)

अब के बसन्त अधिक बनि आयो हो ।

खेलत बहूत सदैव अवधपुर यह सुख कबहू न पायोहो ॥

ओर वेर बहुतै सखि मिलि २ मारति भर पिचकारी हो ।

अबके खेल सरोवर सन्मुख कहि न जाय छवि न्यारी हो ॥

चोवा चन्दन अतर अरगजा नाना रंग अवीरहो ।

केशरी कुम्कुम कीच मची मनो वरषत भादौ नीर हो ॥

चंग मृदंग उपंग बंजरी मधुरे सुर सहनाई हो ।

जीतत जबहि नायका नायक सहचरि उठत बजाई हो ॥

कोउ सखि गुचि अलाघी प्रीतम को कोउ सीतागुन गावै हो ।

दशरथ जनक दुहुं मिलि प्यारी गारी देहि दिवावै हो ॥

यह छवि निरखि सुमन सुर वर्षत उचरतजै रघुराई हो ।

सीता राम फागु रंग राते अग्र अली बलि जाई हो ॥

श्री अग्र पद (८८)

खेलत राम रघुपुरी रुचि सो बहुभातिन सुखदाई हो ॥

इत जानकी युवति मण्डल मेंउत सोभित संग भाई हो ।

चंवर छत्र लिये अजायताका रचना रुचिर बनाईहो ॥

सबैस्वांग को सौज सची जैसे निघट न जाई हो ।

बाजे बजन लगे दुहुं दिशिने गावत गारि सुहाई हो ॥

मनह द्विरद छटे मद माते लरत परस्पर धाई हो ।

केशरिबारि कुन्कुमा भरि २ छुटत छिछ पिचकारी हो ॥

प्रेरित पवन मनहु पावस ऋतु छन वर्षत पुरवाई हो ।

चोवा चन्दन छल बल करिक प्रीतम मुख लपटाई हो ॥
 राजिव नैन लेत जब बदलो तव सिय शैल सुहाई हो ।
 चारुशिला रुख घाई अली इक छल करि पिय घरिलाई हो ॥
 हा हा किये तबै भल छटि हों कैं सीता शिर नाई हो ।
 मृग मद मलय अवीर सुरभि सखि अजिरन कीच मचाई हो ॥
 उमड़ चलयौ अरगजा पनारनि वीथिन नदि बहाई हो ।
 कृस्न अगर सों भरे चह वचा धूप धूम नभ छाई हो ॥
 सौंधो लहरि महोदधि मानो पुरजन प्रीति कराई हो ।
 भरति भरावति कुंवरि कुवर रस होरी कहे किलकाई हो ॥
 मनु मघवा धुनि व्यापि रही सब उठत मदन मन भाई हो ॥
 पख रोटा वीरिन में पंछी मिसके हाथ दिवाई हो ॥
 रवान लगे उडि गई चिरोंजी हंसि करताल बजाई हो ।
 खम्भ २ प्रतिबिम्ब स्याम के जहं तहं देत दिखाई हो ॥
 कुश ध्वज कुंवरि भरति भ्रमसों जब तव हसि करत खिलाई हो ।
 पलटे हकरे जाइ सत्रुहन कज्जल आंख अजाई हो ॥
 करत सबै भामिनि मनभायो नारि वेष बनवाई हो ।
 सिय जू की हों दाशि बदी तो तौही लेहु छड़ाई हो ॥
 रंगरंगे खेलत अंग अंगन जनकसुता रघुराई हो ।
 रीझि सुमन वर्षत सुर संघट दिवि दुन्दुभी बजाई हो ॥
 जाल रंघनिरखत मुख जननी आनन्द सिन्धु बड़ाई हो ॥
 तन धन प्राण करत न्यौछाबरि भारत बहुत वधाई हो ॥
 बीच कियो कौशल्या रानी फगुआ गोद भराई हो ।
 सीताराम विनोद फागपर अग्र अली बलि जाई हो ॥

श्री अग्र पद (८६)

रघुकुल बधू भरोखे भांके राघो खेलें होरी है ।
 भरत परस्पर सुधि नहि पैयत को प्रीतम को गोरी हो ॥
 जहं तहं राम जानकीसन्मुख लाघब कही न जाई हो ।
 केशर कुम्कुम कीच मची हैं वर्षत धन पिचकाई हो ॥
 नभ बिमान गन थकित रहे है सुर बनिता सब गावै हो ।
 पुष्प धृष्टि करि जै जै उचरे प्रमुदित द्वन्द मचावै हो ॥
 केलि कुलाहल कौतुक देखें पुर वासी बड़ भागी हो ।
 सीताराम स्वरूप हृदय घरि अग्रअली अनुरागी हो ॥

श्री अग्र पद (९०)

जानकी खेलन होरी पिय संग चली ॥
 अपने २ भवन से निकली उर सोहै चम्पाकली ।
 श्रुति कीरति उर्मिला माण्डवी चारों जनकलली ॥
 राम लखन रिपुदवन भरत की जोरी बनि हैं भली ।

सिय जु के छूटि गुलाल मठि भरि राधो के पिचका चली ॥
 रमकि भमकि पिय के सन्मुख हाई मुख भरि रोरि मली ।
 दुहुदिशि ते रग वर्पन लागे कुम्कुम छाड़ गली ॥
 राजा दशरथ कोशल्या भरोखन दग रुख लेत भली ।
 सीताराम विनोद फाग में बलि २ अग्र अली ॥
 श्री अग्र पद (६१)

सीताराम विनोद फागकी निरखी सखी बलिहारी ॥
 जग भूषण निर्दूषण जोड़ी राजत अवध विहारी ।
 सुन्दर वर रघुवीर धीर अति शोभा निधि सुकुमारी ॥
 चारुशिला विमलादि अली गन मध्य सीय छाव धारी ।
 श्रुति कीरति उरामिला माण्डवी यूथ २ लिय प्यारी ॥
 अपनी अपनी टाल खड़ा सब रगन साज सम्हारी ।
 प्रीतम स्याम सुजान संग लिय सखा समाज सुधारी ॥
 खेलत रंग उमग अंग २ हार जीत चित्त धारी ।
 चंचल चपल चहुं दिशि सखिगन सखा स्याम दिय गारी ॥
 धूम मची खेलन में सो छवि कहि २ सारद हारी ॥
 अग्र अली उ वशी अहो निशि नील सरासन धारी ॥
 रघुनन्दन खेलत होरी ।

विपुल सखिन संग जनकनन्दनी वन्यो सखा हरि ओरी ।
 फाग मची बहु बाजन गाजन होत सोरचहुं ओरी लसे सब सुन्दरजोरी ॥
 कुंकुम कीच मची सूर्यतट लाल भये जल धारा ।
 वर्षहि रग देवतिय नाचाहि काहु पट न सम्हाराअंग सब रंगन बोरी ॥
 राम सखा ललकारि अग्र बढ्यो इत सखियन करि जोरी ।
 भरत लखन रिपुदवन लालको धरि ल्याई निज ओरिकरहि मनभावन गोरी ॥
 भूषण बसन उतारि लीन्ह सखि निज भूषण पहिराई ।
 रामचरण सखि छांड़ि दीन्ह तव सियजु कि जीत कहाईभई जै जनक किशोरी ॥
 सइय्यां से खेलत होरी हो भुलनि वालि गोरी ॥
 बहुत दिनन में पायो अकेली लाल पकरि भरि कोरि हो ॥
 अ जन दगन लगान्य मधुर हंसी मसलि कपोलन रोरि हो ॥
 मधुर अली मन के भायो कियो मुख चूमत तृण तोरी हो ॥

श्री अग्र पद (६२)

मोपै पिचकारी नघालो छयल जोहमपर पिचकारि चालि हैं ॥
 तो तुम्हे लै भिजाउगी पहला श्री जनकलली जुकि—
 आयसु लैके आउ इत रहो ठाठे गयल ॥
 अग्र अली रघुनन्दन प्यारे देखी मै आज तुम्हारो फयल ॥
 रंग होरी होरी होरी लाल ।
 यह जोरी छबि लखि भई निहाल ॥
 तन स्याम गौर चहुं ओर बाल,
 घन दामिनि पहिरे कनक माल ॥

सिय सुभग गाल पिय दै गुलाल, जनु कनक लता पूजत तमाल ।
चितवत दोउ युगल प्रिया कृपाल जनु होरी वाटत दै गलाल ॥

कहां पायो हैं लाल गुलाल गाल ।
जनि सकुचाहु सांचि कहो कृपाल ॥

कित छैल फैल चपुराई, गई किधों सान्ता ने सान्ति स्वभाव दई ।
मतिविबशभई अतिमोदलई, सबविबशरिगयो फरफन्द ख्याल ॥क॥
हमसे इत निठुराई करत हौ, उत भगनि वश पांव धरतहो ।
देखत सन्त स्वभाव भरत हौ, उघरि गयो अब हिय को हाल ॥
रमताराम सब ही सन प्यारो अर्थ समर्थ सुवेद विचारो ।
व्यर्थ वैन नहि होय हमारो, चैनऐन मुद दें माल ॥क॥
जो हम रमत सबहि सन प्यारी, तोनुमहूँ निज लेहु विचारो ।
सुनिरगगनमगन सुरनारी, वरषि सुमन लखि भई निहाल ॥क॥
रसरसि प्रीतम प्राण पियारे, सियस्वामिनि अँसन भुज धारे ।
युगल बिहारिणि तन मन वारो कनकलता लिपटी तमाल ॥

भूलन विहार

बिजुरी चमके घन घहराय ।
तरवर टपकत कोकिल कूकत पपिहा रटनि नेह उमगाय ॥
पावस छटा अटा चढ़ि निरखत जनक लली रघुराय ।
रसिकअली तड़फत जब वादर प्यारि पिय उर लपटाय ॥
भूलत पधारोजि हमारो राज ।
कारि पिरि घटा घन उमड़ि घुमड़ी आये बिजुली चमकत आज ॥
सुनी वानी रस सानी प्यारे चले भूलन के काज ॥
कृपा निवास अली की जीवन गरे लाग तजि लाज ।
प्यारी भूलन पधरो भुकि आइ बदरा ।
सजि भूषण वसन आंखियन कजरा ॥
पान कीजिये काहे को सुख लीजिये अली ।
तुमतो परम सयानी मिथिलेश कि लली ॥
देखो अवध ललन पिया आगे खडे ।
रस वर्षे सुधा मुखि जब पायन परे ॥

श्री अग्रपद (६३) चले दोउ भूलन को हलसान ॥

पिय प्यारी के नित्य भूलन है नहि कलु काल प्रमान ।
पाय प्रदोष काल सखियन संग गान तान भ्रमकान ॥
पहुंचे भूलन कुंज सुहावत फले विविध लतान ।
मोरन के यूथैं बहु विचरैं, नाचत पंख फुलान ॥
जाति जाति के पक्षी बोले भरि रहे शब्द दिशान ।
चहुँदिशि मणि मय महल बिराजे मध्य बिचित्र वितान ।
तामधि सुन्दर परयो हिडोला मोतिन के लहरान ।

तापर बेंठे दियगल बाही प्यारी पिय रस दान ॥
 नाना यन्त्र लिय सखि गावति लेत स्वरीली तान ॥
 दोउ दिशिते सखि भूलवन लागि छवि लखि हिय उमड़ान ॥
 दोउ मिलि भूलत हैं रसमाते अग्र निरखि वलि जान ॥
 करि भूलन रस सिन्धु मगन दोउ चले व्यारि अस्थान ॥

श्री अग्र पद ६४ मल्हार जनकपुर लागत तीज सुहाई ॥
 रंग रंगीलो प्रतिहि छवीली सबमिलि भूलन आई ॥
 सावन मन भावन पिय प्यारो अवनी सहज सुहाई ॥
 पावन कुंज पुंज सुख वरषत करषत मन वरषाई ॥
 कंचन खम्भ जड़ित डाढी नग विविध विचित्र बनाई ॥
 रेशम डोरि कारि वनि आई चहुं दिशि जलज जराई ॥
 लाले बाल लाल रंग भीनी लालन लाल लड़ाई ॥
 श्री प्रसाद, प्यारी कर गहिकै मंमल गाई चड़ाई ॥
 चारुशिला, पिय नैन इशारन भूलन प्रथम सिखाई ॥
 भोका देत लेत सुख पिय को मन्द मन्द मुस्काई ॥
 लली पाग लाल शिर चुनरी लाली अति मन भाई ॥
 उमगेउ रंग अनग परस्पर मैन मलार जमाई ॥
 गावहि समर रंग भरि भामिनि कोकि त कण्ठ लजाई ॥
 ठाकुर हमरे राम मन मोहन अंगन रूप लुनाई ॥
 ठकुराइन मिथिलेश लादिली शील सनेह भलाई ॥
 होड़ा होड़ी मच्यो है हिडोला शोभा कहि न शिराई ॥
 अग्र अली प्रिय दम्पति भूलत जनक लली रघुराई ॥

श्री अग्र पद (६५) हिडोरने भूलत जनक दुलारी ॥
 सखि इक जोर किशोर रूपनिधि विविध भांति तन सारी ॥
 कंचन खम्भ पाटि पडुली डाडी विद्रुम दुति न्यारी ॥
 पद्यराग मडुवा वेलन पन्ना आड़इन्द्र मनि भारि ॥
 धाम निकट आराम हरित द्रुम क्रीडत तह सुकुमारी ॥
 गावत मिलि हैं हरषि हिडोरा कल कण्ठत उन हारी ॥
 करन अन्दोल लोल चंचल चल जनु दामिनि छवि हारी ॥
 सांठ लिये सजनी डरपावती नाम लेहु पिय प्यारी ॥
 नाम न लियो सरूप सूचि कर देखि ईषु धनु धारी ॥
 समं स्वेद विन्दु निरखि वदन पर अग्रअली वलिहारी ॥

श्री अग्र पद ६६

तितला हिडोले भूलत सिय महारानी ।

श्रुति कीरति उमिला माण्डवी चारुशिला गुणखानी ॥
 रच्यो हिडोरा नाम लाववति चतुर सखी मुसुकानी ।
 सिया जू सकुचिरही नहि बोलति अग्र अली मनमानी ॥

श्री अग्रपद(६७) हिडोरे भूलत सीताराम ।

स्याम गौर अभि राम मनोहर रतिपति के चितचोरे ॥
 नील पौत वर वसन लसत तनउठत सुगन्ध भुकोरे ।
 सहचरि हरषि भूलावति गावति छवि निरखत तृण तोरे ॥
 मन्द २ मुसुकात छवीलो रमकत थोरे थोरे ।
 अति सुकुमारि अग्र की स्वामिनि डरपि गहति पट छोरे ॥

देखो राम बने जनु सावना । सिया लागि रंग वढावना ॥
 सियवर की मोतिन की माला सो वगपांति लजावना ।
 इन्द्र धनुष सिन्दूर सिया को घनरस को वरषावना ॥
 पछिले पवन सुसन्त विचारो स्याम घटा प्रगटावना ॥
 रवि विनु कवि बुद्ध मिलि के लागे रस की भरी लगावना ।
 सिय जू ऊत्तर दिदि की दामिनि राम स्वरूप लखावना ।
 चमकी भूमकि सो निज दाशन के अन्तर जोति जगावना ॥
 ब्रह्मदेव हूँ यह सावन को करत निरन्तर ध्यावना ।
 सियाराम जू जन्म २ की जिय की जरनि मीटावना ॥

भूलैं नलल हिण्डोले, पिय प्यारे संग बनि ठनि स्यामा ॥
 रतन जड़ित अति रुचिर हिण्डोला तामैं, रचना अनेकद्रुम-
 सावन के कुंज बीच, बाजत मृदंग आदि गावत समूह-
 सखि, कोटि काम रति बामा ॥ सीतल सुगन्ध मन्द वायू-
 के प्रसंग तहां, घेरि घेरि आवत बलाहक के वृन्द नान्हि,
 नान्हि बुदियन वरिषनके समै छबि, अति शोभित सिय-
 रामा ॥ शीश को नवाइ ईश को मनाई कै मुनिश, वार २-
 विनय करत कर जोरि २. नृपति किशोर व किशोरी जू-
 आनन्द रहै, यह हमार मन कामा ॥

रागमलार

नृपनन्दन मिथिलेश किशोरि अलबेली भूला भूलै ।
 पांयन पांय करन कर जोरे अरस परस रस हूलै ॥
 मरकत कनक चर्म मन सिज के गोहन रग अतूलै ।
 रसिक अली अद्भूत रस लीला निरखि १ चित फूलै ।

लिये भूलै छबीले सुधर धनिया ।

धुंधट बीच अनोखी चितवनि बदन सरोज कशे तनिया ॥
 मन्द हंसनि मुख चन्द सुवारस जनकलली रघुकुल मनिया ।
 शीलमणि नव रंग रंगीली जोरी बनी सुखद धनिया ॥

श्री अग्रपद (६८)

भूलत राम राजीव नैन ॥
जनक जा सनमुख विराजति तडित ज्यो घन गैन ।
अतिहिं भूलत मनहिं फूलत रहसि तोषत मैंन ॥
लाल के उर लागि शोभा निरखि करपत ऐन ।

परसपर अतुराग दोउ वदत मधुरे वैन ॥

जाल रंघनि निरखि वनिता अग्र उरसुखदैन ।

भूलो नित यहि भूलन हों, मोरा वालम जी ।
आप भूलो व भुलावहु प्यारी हिय हिय में रस फूलन हो ॥
भूमकि भुलावै अलिगन गावै चितवन की अनुकूलन हो ।
जुलुफनि जाल अरु भि मुसुकावै फहरनि अंग दुकूलनहो ॥
स्याम सुरभि वन सघन सुहावै दामिनि छवि घनतूलन हो ।
यह शोन्दर्य निरखि सुख वनिता हिय नव नेह सुमूलन हो ॥

पिय लखु सावन सुवहरिया ।

धीर समीर नीर बरपत सत वशि गये सबुज सहरिया ॥
भूला भूलिये भूलिये मति पिय करिये नित कचहरिया ।
कोविद मोद विनोद महा लखु जल थल वहत डहरिया ॥

प्यारी भूलन पधारो पिय रस वरपै । तुम दामिनि वरण
पिय घन दरपै ॥ यह लखन सरस इस दृग तरसै । दै सबहि
ललित सुख विधुकर सै ॥ चली लली जु भूलन सुनि सखि
बच सै । लखि नकल प्रिया के बड़ भाग फल सै ॥

श्री अग्र पद ६९

भूलत सिया राजिव नैन ।

रतन जडित हिडोलना सखि राम सुख के ऐन ॥
स्याम अंग पर गौर भलकत दामिनी घन गैन ।
मेथिली रघुवीर शोभा निरखि लाजत मैंन ॥
नाम पिय कौ लेहु नागरि सब सखिन मन चैन ।

जानकी नहि लेत मुख सो देति लौचन शैन ॥

परस पर भूलत भुलावत वदत मधुरे वयन ।

अवधपुर नित केलि दम्पति अग्रआनन्द दैन ॥

श्री अग्र पद १०७—हिडोरना में काँई भूलो राज ।

पिया प्यारी सुकुमारी ॥ अगर चन्दन को बनो हिडोरा-
मलयागिरी को पटा । रेसम डोरि पवन पुरवइया वह-
सावन की घटा ॥ प्यारी भुलैलाल भुलावै मली बनी-
सजनी । उड़ि २ अचरा परत भुजनि पर डरपति शशि-
बदनी ॥ विपित प्रमोद लता कुन्जन में श्री सग्यु के

तटा । सिय प्यारी के भूलना वे निरखति अग्र छटा ॥

श्री अग्र पद १०१

दशरथ सुत अरु जनकनन्दनी चितवनि में चित चोटैरी ।
नान्हि २ बुन्द पवन पुरवैया वरपत थोरे २ री ॥
हरि २ भूमि घटा भुकि आई सूर्यलेत हिलोरे री ।
उपवन बाग विहंगम बोलें दादुर मोर चकोरे री ॥
हयदल पयदल गजदल रथदल कोटि बने चहुँ ओरे री ।
बाजन ताल मृदंग झाँझ डफ शंकन की धनघोरे री ॥
नागरी नाम लिवावैं पिय को सियजू हंसि मुख मोरे री ॥
अग्रशप्त हरिरूप निहारे चरण कमल बलिहारें री ॥

— ❦ —

भूलत नवल दशरथ लाल

सरयु तीर प्रमोदवन में लिये संग सिय बाल ॥
अरुण मणिमय हेम डाँडी रतन खम्भ विशाल ।
गुही रेसम डोरि मोतिन पडुलि जटित प्रबाल ॥
लखि विचित्र हिडोल विमला नटति दे करताल ।
हेरि हरि मुख देति झोका परी छवि के जाल ॥
प्रेम वश लखि गही प्रीतम बोलि बचन रसाल ।
राम सखे विलोकि यह रस कोत होत निहाल ॥

— ❦ —

दशरथ राजदुलारे सिया संग भूलें हो ॥
सूर्य किनारे सुहावनि कदम जुरि छहियां हो ।
ताहि तरे भूलें हिडोला दिये गल बहियां हो ॥
एक ओर जनक किशोरी सखिन संग सौहैं हो ।
एक ओर राधो बिहारी लली मुख जोहैं हो ॥
प्यारी के लट पिया जुलुफन भूलत अरु भैं हो ।
अचल रहैं सखि स्यामा कबहुं नहिं सुरभैं हो ॥

— ❦ —

राग सोरठा—नवल रसिक भूलें, प्यारी संग लीन्हें । मन सो
मन दग सो दग दीन्हें ॥ चारुशिला अलि हरषि भुलावैं-
गावैं तान नबीने । बजत मृदंग ताल सारंगी लेत तान-
स्वर झीने ॥ बड़त उमंग अंग अंग छिन २ पिय प्यारी-
रंग भीने जाना अलि छवि निरखति ठाड़ी सो समाज-
जित कीन्हें ॥

— ❦ —

रसिया नामानैं सजनी भूलत मन न अघाय । सोवति
सजनी अपने भवन में औचक भोहि जगाय ॥ वन
प्रमोद कुंजन २ में नित उठि झूलत आय । जाना अलि-

सिय पिय संग भुलिहों अभय निशान बजाय ॥

—६३—

हिडोरे भूलत कौशल चन्द ।

बाजहि वाजन मधुर गान ध्वनि देशों दिशि होत आनन्द ॥
सयूँ तीर शुभग शृंगार बन ललित परन फल फूले ।
गुंजहि अमर मधुर स्वर कोकिल बोनहि पिय अनुकूले ॥
फूलन केर विचित्र हिडोरा लसत फूल मय डोरी ।
फूलन के युग खम्भ मनोहर रचि पचि सच्योरी ॥
फूल मुकुट पर लसत रामके फूलन के सिय सारी ।
नख शिख लौ फूलन के भूषण दम्पति अंग सँवारी ॥
फूल तरंग उडत सयूँ की फूल वरषि घन घानी ।
रामचरण सखि सब शृंगार किये फूल गान मय बानी ॥

—६४—

हिडोले भूलत सिया रघुनन्दन ।

चलरी सखी नैनन सुख लीजै देखि २ दोउ चन्द ॥
मावन घन घमण्ड झुकि आयो मधुर २ झरि घोरे ।
मधुर मधुर मृदंग सहनाई बोलहि नाचाहि मोरे ॥
भूलहि रघुवर जनक नन्दनी सखियाँ भुलावहि जोरे ।
भूलहि भूमि जाँहि सयूँ में झुकि छबहि हिलोरे ॥
अति सुन्दर बन बन्यो हिडोरा संग सगाज सब झलै ॥
इत उत झुकि २ झलै हिडोलन मारहि गैदन फूलै ॥
झलौं संग झुलावहि बहु प्रिय मधुर २ स्वर गावैं ।
रामचरण नभ सुर तिय नाचाहि गाय सुमन झरि लावैं ॥

—६५—

हिडोले झूलत लाड़िलि लाल

नील सघन पल्लव तरु शोभित जनु बितान घन माल ।
गर्जहि मधुर २ पिय मन लै कोकिल शब्द सुराल ॥
बरषत मेह झरत तरु अमृत बोलत मोरि रसाल ।
श्री सरयू उमगत उज्जवन जल लहरि उठत मनोजाल ॥
त्रिविध पवन निन्दत मारुत चल पट फहरात सुलाल ।
पद कर भूषण तड़ित नखत शशि निन्दत धनु सुर पाल ॥
बहु सखि संग २ भूलत हैं बहुत भुलावत बाल ।
गावहि मधुर लाल मन मोहैं करहि विविध रस खयाल ॥
मनहु मदन रति के व्याहन कहं साजि सकल निज जाल ।
लाल बिहार देखि वन भूल्यो बिशरि गयो सब हाल ॥
यह रस रासि रसिक कोई सखि सोई निशि दिन रहत निहाल ।
रामचरण यह छाँड़ि कहै कछ कारिख तेहि मुख भाल ॥

—६६—

हिडोले झूलत प्यारो प्यारी ।
 नव योवन गुन रूप नये दोउ रघुबर जनक दुलारी ॥
 अरुन बसन वर लसत दोउन तः मनि भूषन छविकारी ।
 इत प्यारी को हलत चन्द्रिका पिय कलंगी छवि भारी ॥
 मचकै लेत हिचकि दोउ गति सो पग नपुर झनकारी ॥
 गाबत अली मलार राग रुचि गोउ गति लेत सुधारी ।
 कनकभवन मुद मंगल शोभा नित उछाह रसकारी ॥
 रसिक अली बारत तन मन धन निरखि २ बलि हारी ।
 दिये गल बांहीं, झूलै दोउ रसिया ।
 नेह नदल रस रंग बढ़ाये जनु दामिनि घन माषी ॥
 अति बिचित्र रसमय हिडोल में छवि सख सिन्धु सनाही ।
 झूलत रसिक मनि रघुनन्दन । संग सिय अलबेली नागरि
 वदन छबि बहु चन्द ॥ रतन जटित हिडोलना लखि सूरशशि
 दुति मन्द । रसिक अलिगन भुनावति फंसी छबिके फन्द ॥

प्यारो प्यारी को झुलावे गावे रसभरी तान ॥ कनक
 भवन में कनक हिडोला रविशशि ज्योति लजावै । चहुँदिशि
 ललित बितान बादले झालरि भुमका सुहावै ॥ इत घन गरजत
 रिमझिमि वर्षत मृदु मृदंग घुनि छावै । रसिक अली सिय
 प्रीतम ऊपर बार २ बलिजावै ॥

तेरी झमक झूलन पर वारिरे ।
 झूलन जोर मोर अंगन की चित वनि अनियारिरे ॥
 पान खात गावत स्वर मधुरे छबि उमगत लग प्यारिरे । कृपा
 निवाश दाशि चरणन की अवधविलास बिहारिरे ॥

झूलैझमकि झूलनवां लाल लली । वन उपवन निन्दत नन्दन बन
 पूरि रह्यो फलि फलन फुलनवां ॥ सुर निरखत अति दशन
 अधर छबि छकी भारती जितन तुलनवां । कोविद तन
 मन भूषण बसन सब करत निछावरि उपर हुलनवां ॥

सिय जहो झूलत फूलभई
 फूली २ भूल हिडोबे अनुकूली अधिकई ।
 प्रीतम प्राण झूलावत छबि सो शोभा निरखि नई । रूप रसिक
 रस छके परस पर मनत न ह तू तई ॥

झूलन कि झांकी अझब बनी है प्यारि संग झूलै पियरबारे ।
 स्यामलि सूरतिया पै गोरि सिय सोहति अखिन में सोहै कजर
 वारे ॥ भूषण बसन राससिय राजतरति अनंग छवि छोरवारे ।

सरयू तीर प्रमोद विपिन में हरि लीन्हो मेरो हियरबारे ॥

घनगरजै चमकै दामनिकां सृनि २ बोलत मोरबारे ।

नान्हि २ बुदिया परतभूमि पर धीरे २ बहत समिरबारे ॥
रामशरण दम्पति सुखमालखि नैनन बहै जलधर बारे । झूलन
कि झांकी में चित नहि जाको जनु भूंकत कुकर सियरबारे ॥

झूलन्दा तेरी अंग २ माधूरी जोर । सुरंग पाग मोतिनदी
कलंगी हंसि बोलनि चित्त चोर । भूकुटी कुटिल नैन रतनारे
हेरनि बंक मरोर । प्रिया सखी दोउ अवध बिहारी बलिहारी
तूण तोर ॥

झूलते हैं झुला मूला मुद लाल ललीरी ॥ झुलावै नजीर बना
हीर मनि गना । झूलवाती हैं हुस्म भरी भीर अलीरी ॥ देता
है आब अन्न जन्न हुस्म दिल नसीन । जाना जहान आन
मानो कल्प कलीरी । बागे बहार जागे दिलदार कार सब ।
धीरे समीरे सीरे गति लागि भलीरी ॥ गाते हैं गुणो ल्याते
हैं तानें अजब बहार । कोबिद रचे हैं नाच परी दिल को
छलीरी ॥

राधो रमकि झुलावै प्यारी बाढ़त उमंग । लखि ललकि नवेली
गावै नवल सूंग ॥ सोहै भूषण अमोल मणि वसन सुरंग ।

मोहैं मनसिज रति लखि सखिन को अंग ॥ सिय वदन
विलोकि लाल भये मन दंग । सिय रसिक अलो के हिये
यही रस रंग ॥

हो जि धीरा रझूलो लाड़िली डरैछै । अंग उघरै छै मोति लर
लरकि परैछै ॥ अति सुकुमार भार योवन को मृगनैनी चोंकि
परैछै । जन रघुनन्द सिया पिया छबि पर पलकों से पवन
करै छै ॥

दै गलबाहीं झूलै दीउ आज ।

सरयू तीर तमाल कुन्ज में जनककलली रघुराज ॥ काह कहूं सखि
कहत वनैना कोटिन सुख के साज । सधुर अली सब तजि संग
झूलिहौं छांड़ि लोक कुल लाज ॥

धीरा झूलो जि धीरा झूलो ।

मोरि छतिया धरकि कांड़ हूलो ॥ बार छटिगै हार टूटिगै गिरिगे
अंग डुकूलो ॥ राम रसिक रस सहजक लीजै नाजुकतासम
तूलो । कृपा निवाशी कहत छबीली छैल मया जनि भूलो ॥

झुलावत रामरसिक पटरानी ।

नेह नाह को निरखि नागरी नैनस में मुसुकानी । कर गहि

डोर चकोर डगन करि चितवनि चन्द सुभानी ॥ कृपा निवास
विलासिनि प्यारी प्रीतम को रस दानी ॥

तेरी बाँकी झूलन पर दारि रे ।

झूलन जोर हिया विच कसकत मानहु हूल मटारिरे । मैन
कटाक्ष वान धनु भकुटी जुलुफन जाल सुधारिरे । कृपा
निवासि दाशि चरणन की रहिगई ठाड़ि कि ठाड़ि रे ॥

ललित ललि लाल अलि झूलने झूलही ॥ सरयु सरि तीर
मनि महल मोहन मदन मध्य परिकर निकर सुकर रुचि हूल
ही ॥ युगल उत्साह चित चाहैपंकज कली सुरितुरवि निरखि
हिय हर्ष फबि फूल ही ॥ गान तर तान रसदान दश दिशि
श्रवण सुनि सुधनि युग्म सखि विकी विन मूलहि ॥

सरयू कूले बना रहैं सावन । पिय प्यारी नित भुला भुलै
अलिगन झमकि भुलावन ॥ घन गरजनि चमकन दामिनि
की मीरवा बोल सुनावन । बाजहिं वीण मृदंग मुरलिका राग
रागिनी गावन ॥ छत्र फिरावन व्यजन चलावन दुहु दिशि
चंवर दुरावन । मन्द हंसन चितवन रस बोल न नैननि शैल
चलावन ॥ अतर पान माला की पहिरन अरत परस मन
भावन । भूषण वसन अंग अरुझावन भुज से भुज लपटावन ।
गैद उछारन कमल फिरावन रसिकन हिय सुख छावन । रस
माला तृण तोंरि अशीषत राइ लोनि उतारन ॥

सदा भूलो मेरे दिलवर बढ़े उत्साह नया । जियो युग २ प्रिया
प्रीतम यहि है चाह नया ॥ लताबितान वन प्रमोद तीर सरयू के
हिडोल अति बिचित्र मनिनमय तयार नया । अनेक यन्त्र बाजते
मृदंग वीणादिक । अलापती हैं गान कला सजे साज नया ॥
यही है चाह सदा नाथ अली चकोरिन के । बैठे झूलन पे दिखा-
ते रहो मुख चांद नया ॥ यही अभिलाष कान्ती लता श्री सिया
जू की की । बढ़े दिन २ सदा सनेह सुख सुहाग नया ॥

हिडोले भूलै श्री जानकि जान ॥

युगल प्रकाश कुञ्ज कुञ्जन में बिपिन प्रमोद लतान । स्याम
बदन पर जुल्फें छोड़े मन्न २ मुसुकान ॥ प्यारी संग समाज
अली गन लेत नई नइ तान । युगल प्रिया बारत तनमन धन
करत निछावरि प्रान ॥

भूलै प्यारी भुलावै प्यारी ॥ मधुर २ करकज मंजु गहि रेशम
रजु सुकुमारो । नैनन निरखि नकेली बिधुमुखमन्द हंसनि नृप
बारो । अरुझिरहे अंग २ परस पर सरुझनि अगम निहारो ।
युगल अनन्य अली झूलन लखि तन मन सरबश बारो ॥

नवल हिडोलना सखि झूलन दशरथ लाल ।

गरजि घन कोकिला बोलहि उमगि आनन्द माल । सखा नुज
सब नवल सुन्दर कीन्ह नवल शृंगार । भूलि नवल हिडोलना
सखि लाज कोटिन मार ॥ पवनमन्द सुगन्ध सीतल नील घन
चढ़ि आय । लसत दामिनि भूलते जब युगल पट फहराय ॥
सुमन वर्षहि देव हर्षहि किन्नरी बहु गाय । रामचरन समस्त
देखहि अवधपुर जनुधाय ॥ —

चलो सखि देखन जइये, राघोजि रचो है हिडोल । हेम रतन
मय रचो है हिडोला हमहूँ भूल भुलैये ॥ रघुनन्दन की छवि
जनकनन्दनी निरखि नयन फल वैये । गाउब नाचि बचाइ
भली बिधि स्यामास्यामरिझये ॥ सावन के अनुहरित सुहावन
सुभग शृंगार वनैये यूथ । २ मिलि चलि हैं सुलोचनि लली
लाला मन मडये ॥ अति सुन्दर वन बनो हिडोला बहु बसन्त
छबि छइये । रामचरणलखि सिय रघुबर छवि, रति पति कोटि
लजइये ॥

भूलत नृपति किशोर किशोरी । बिपिन अशोक सुभग सरयू
तट हरित भूमि चहुँ ओरी ॥ मध्य महामण्डप भूलन को मणि
मय सुभग वन्योरी । तामधि भूलत प्रीतग प्यारी सग सखी गन
क्रोरी ॥ प्रीतम चारुशिला दिशिराजत श्रीप्रसाद सिय ओरी ।
शान शृंगार सजे नवनगर नागरि रंग भरौरी ॥ सन्मुख श्री
मैथिली इशारे लीला सखिन कियोरी । कमला चन्द्र कलादिरंगीली
बीण मृदंग सज्योरी ॥ कोउ गावति कोउ नृत्यति थिरकत राग
मलार सुहोरी । अति आनन्द उमंगतरंगन मानदाशमुखसोरी ॥

भूलद लिया वल्लभ लाल ॥ लाल कंचन सम्भसुन्दर ललित
डाड़ी लाल । लाल भूषण अंग झलकत लसत चीर सुलाल ॥
लाल दोउ के बदन शोभा अधर बरीं लाज । लाल सखिया
लाला गावति सब भुलावैं लाल ॥ मोर हंश चक्रोर कोकिल भनत
वानी लाल । लाल रीझत लाल ऊपर परस्पर सब बाल ॥ भुलत
भुलावत औसरिन सों परस्पर सबबाल । कृपानिवाश सुलाल
जोरी निरखि नैन निहाल ॥

चलो देखें सिया रघुवीर भुलनवों भूलि रहे । रहि २ झोंका
देत अलीगन उड़त सुरंग रंग चीर ॥ झोंकनि में अलकें भुकि
भूमत मनहु भंवर की भीर । मन मृग मोहनि को वेधत है
तकैनि तीर वेपीर ॥

व्याख

श्री अग्र पद 102-चले दोउ व्याख कुंज अली ।
कारि विहार भूला के दम्पति रघुवर जनकलली ॥ रतन
जड़ित शिविका अति सुन्दर तावर लाल लली वहुं दिशा
सखियन सौज लिये है नाना रंग रली । पहचे व्याखी कुंज

सुभग जहाँ मध्य सुरतन थली । करि सन्मान सखी कुंजेश्वरी
आनन्द भरि उछली ॥ ब्रैठाई रतनन चौकी पर पूजन करि
सुभली । नाना विजन कनकथार में अग्र धरी रसली ॥

श्री अग्र पद १०३-सखी सब शैल भोग लै आई ।
मेवा मिश्री दूध मलाई और अनेक मिठाई ॥ सुरभीयुत विजन
बहुतेरे थारन भरी सुहाई । पान पदारथ शुचि सुगन्ध मय
वहु औषधन मिलाई ॥ पावत तुष्ट पुष्ट होई जावें रास
जनित श्रमहाई ॥ चपकन में भरि धरि आगे में दम्पति के
मन भाई ॥ पावन लगे रसिक दोउ प्यारे करि २ विजन
बड़ाई । हंसत हंसाबित सखिन पवावति वातन में बिर
माई ॥ करिभोजन अचवन पुनि करि कै पान पाइ मुसुकाई ।
शैल आरती अग्र करी जब पौढ़े पलंग सुहाई ॥

श्री अग्र पद १०४-व्याहू करत युगल रस भीने ।
रचि २ बिजन सखिया परोषै बहुत प्रकार नाम को गीने ॥ हंसि
हंसि पावत हैं पिय प्यारीरूपमाधुरी सखि चित दीने । प्यारे
निजकर कमल कवल लै प्यारी मुख में देत प्रवीने । तैसहि
प्यारी नोपिय मुख में ग्रास पवावति अति मधुरीने । मिसरी
बहुत सुगन्ध मिले जो दुध पवावति सखि कर लीने ॥ करि
व्यारी अंचवाय सखी सब पान पवाय सुगन्ध भरीने । दे
गलवांह प्रेम रंग भीने शैल कुंज सुख अग्र नवीने ॥

शयन

श्री अग्र पद १०५-वठे सुखपाल लाल आबत महल में । आगे
२ भीर भारी पाछे असवारसारी ताँ मध्य रघुवर मदन गहल
में ॥ चुनि २ कलियां में सेज वनायो चेबा चन्दन छिरको
चलह में । पाढ़े दशरथ राज कुंवर वर अग्रअली निज दासि
टहल में ॥

श्री अग्र पद १०६—पौढिये रसिक जानकी रमन । सचं ऋतु
के भोख यामें महल अति मन हरन ॥ बिबिधि रचना बनी
जहं जहं बिधि निपुणता हंसन । सेज रचना बनत कहि नहि
मनहु मर सिज भवन ॥ पिया प्यारी ताहि ऊपर केलि कर
सुख सदन । यहई आशा अग्र सखियन सुफल कुरुललि ललन ॥

जानकि बल्लभ लालकी सखि आरति कीजै । सुन्दर वदन
बिलोकि के नैनन फल लीजै ॥ कुण्डल ललित कपेलना श्रुति
अलक बिराजै । कण्ठा कण्ठ सुहावना गजमुवता राजै ॥ पाग

वनीजर तार की दुपटा जर तारी । पटुका है पचरंग को मनि
जरित किनारी ॥ सिया जुकि सोहै लाली वूनरी जरिजरित
किनारी । रसिक अली की स्वामिनी अद्भुत छवि भारी ॥

श्री अग्रपद (१०७) मुख सेज पौढिये राम सीत । रमण । राग रंग
सुसुचिर शौरभ सौज बिटिका चित्र चंदवा विविध सुन्दर
भवन ॥ रूप शुठि गुण कोक विद्या कुशल रचना वचन विदुष
सुपिया पारस गवन । जनकजा राजीव नैन सुमैन छवि लखि
अग्र सहचरि जान अपर सो कवन ॥

श्री अग्रपद (१०८) महल में सोवत है दोउ प्यारे ॥

रतन जड़ित पलका अति सुन्दर मयन मनहुं तन धारे । ताके
ऊपर विस्तर पय के फेन लजावत हारे ॥ तापर पौढ़ युगल
बिहारो हर रिपु कला सुधारे । करत केलि नाना बिधि दम्पति
सखियन नैन निहारे ॥ हंसि २ बातें करत परस्पर वर्षत मोद
अपारे । अग्र स्वामिनी स्वामी दोउ जीवन प्राण अधारे ॥

श्री अग्रपद (१०९) चलो सखि सो गये राज किशोर ॥

मणिन जड़ित की पलंग मनोहर ताके छविअति जोर । मिली
सखियन सब चरण पलोटत रस बश पिय घनघोर ॥ चौकी
बालि सजग होइ रहियो लागे न कहुं दृग चोर । तूपुर दावि
चलो मोरि सजनी होय न जेहि पग सोर ॥ शुभग सेज सिय-
राम शयन लखि ललचत हैं मनमोर । अग्र अली दम्पति
दर्शन हित आवहिगी बडिभोर ॥

श्री अग्रपद (११०) महल बिच शोर करै जनि कोइ ॥

कछूक रहस बश कछू आलश बश अबहि मैथिली सोइ । तूपुर
दावि चलो मोरि सजनी तनक भनक नहि होइ ॥ पहरेदार
सजग होइ रहियो आवागमन न होइ । अग्र अली के जीवन
धन दोउ जगै न पलका सोइ ॥

श्री अग्रपद (१११) चली सब युग छवि हिय में धरी ॥

सोय गये सखि पिय प्यारी अब आनन्द रस में भरि । लाल
लली गुण कहत परस्पर आनन्द सिन्धु परी ॥ निज २ कुंज
के ओर गई सखि युथेश्वरि सवरी । सबसे मिलि संग चारु
शिलाथल अग्र गई स्वथरी ॥

राघोजी छबीले प्यारे तूपुर न छोरो । चरण शरग आई
ये तुम्हारी जानि विरद जनिटोरो ॥ नीद विवश सब तीय
महल की डर न करो पिय मेरो । राम सबे चित चढै जौ
तिय ताहि जाइ रंग वीरो ॥

राधो जी कनक भवन को राज ॥ पटरानी सिरताज सवन
की आयशु करतल काज । नृपशार्दूल शान बड़ जग में न्याय
सवै सुख साज ॥ आनन्द सिन्धु लाज दरवारिन कौन उलंघ
सु नाज । दण्ड चोर जन सब को हित शोन्दर्य निहारोआज ॥

श्री अग्रपद (११२) चहियत कृपा लली सीता की ।

नबधा भक्ति ज्ञान का करना मिट गइ शंक वेद गीता की ॥ षट
मत वेद पुरान पुकारत करत बाद नरबपु बीता की ॥ भगरो
करे अरभै सुरभै नहि मिटत न एक द्वैत भीता की ॥ जाकी
ओर तनक हसि हेरत करत सहाय रामजी ताकि । अग्रअली
भजु जनकनन्दनी पाप भण्डार ताप रीता की ॥

इति अष्टयाम प्रसंगः

दोहा आंखहि देखत जगत को आंख बिना नहि कोय ।

अन्तर बाहर सब जगह मित्र आंख ही होय ॥

ॐ श्रीमति सर्वेश्वरी श्री चारुशिला स्तुतिः ॐ

जयति चारुशीला चरण शरण माद भरण पुंज । अरुण वरण
कमल रज पराग रस-भ्रमर गुंज ॥ सुजन हृदय बास करण
सकल शोक ताप हरण । जनम मरण नसत रूप नवल धार
रहन कुंज ॥ श्री जानकी रमण बिहार मिलतकृपाते उदार ।
बिना चारुशीला कृपा रस कि रीतिनहि मिलंजु ॥ श्रीसर्वेश्वरि
हमारि स्वामिनि बलिहारि जानु । अलि बिहारिणी तिहारि
कोर कृपा की करंजु ॥

दोहा-चार द्वार युग सात आवरण कनक आवाश । मध्य बाग
बिच शैन गृह रंग महल है खाश ॥ रवि पावक शशि रंगकय
खम्भावलि चहुं फेर । तीन आवरण महल सोइ रंग खण्ड नौ
केर ॥ फाटक मुख्यसु पूर्व है लघु दक्षिण हूं जान । तिनभीतर
मधि आगने कमल लक्ष दल मान ॥ तापर हूं त्रय मण्डलाकर
खम्भ मनि रंग । मध्य कर्णिका पर पलंग राजत सिय पिय
संग ॥ ध्यान सियावर नित्य यह पावै कृपा प्रसाद । श्रीहनुमत
हिय रूप श्री चारुशिला अलहाद ॥ वेद प्राण कर तत्व यह
सुनत जरै भव पाश । मन्त्र राज के अर्थ विनकल्प करै निज
नाश ॥

भांकी पद

श्री अग्र पद (११३)

आज राम जानकी कृपालु सुन्दर सोहै । निरखत सुर नर बर मुनि शिव
बिरंची मोहै ॥ राम जी के शीश क्रीट रत्न जटित धारी । सिया जी के शीश
फूल कोटि चन्द्रबारी ॥ रामजी के प्रीताम्बर घनुषबाण राजै । सिया जी के
कर कमल मुद्रिका बिराजै ॥ राम जो के कुण्डल की काम कोटि शोभा । सिया

जी के कर्णफूल राम को मन लोभा ॥ रामजि के उर सोहैं मोतियन की माला
चारु हार रुचिर पहिरि जनक कुवरि वाला ॥ रामजि के कटि किंकिन भुनुक
२ बाजैं । सिया जी के छुद्र घंटी मदन मन्त्र लाजैं ॥ रामजि धनश्याम वर्ण
छवि के अभिरामा । सिया गौर कनक वर्ण लाजत सत कामा ॥ सिया जी कि
नखशिख छवि कहत नही आवै । कोटि शेष सारद श्रुति पार हूँ न पावै ॥
यही ध्यान हिय में रहत टरत नाहि टारचो । अग्र युगल चरण उपर वारि
फेरि डरचो ॥

देखो २ सिय पिय संग राजत चारुशिला सुकुमारी ॥ शिरअवैचन्द्र सिन्दूर, वर
विन्दू छवि भरपुर । लखिरति मान भयो अति दूर सारी नील रंग जरतारी
देखो ॥१॥ भुकि रही चन्द्रिका नीकी, मुसुवयान मन्द सुख जीकी, है प्राण प्रिया
सिय पी की, मिथिना सत्रुजीत नृप वारी ॥ हगकोर कृपा रस भीनी कर नील
पद्म वरलीन्ही, सर्वेश्वरि "अलि" सुख दीनी, विहरत कनक भवन सुख कारी ॥

श्री अग्र पद ११४-देखो माई नवल कुँवर दशरथ को ॥ मणि ॥ मय जटिन कीट
अति सुन्दर गोरोचन को टीको । अम्बुज नयन नाशिका सुन्दर कुण्डल भलकत
नीको ॥ मणिमय जड़ित हार अति सुन्दर हीरा माणिक नीको । कलित ललित
जरकसि को जामा आभूषण पुष्पन को ॥ उर सोहैं मोतियन की माला भृगु
लच्छन छवि नीको । कर कंकन बाजूबंध सोहैं धनुष विराजत निको ॥ कटितू
णोर बाणकर राजै कमल फिरा वत नीको । अग्रदाश भजु दशरथ नन्दन
मोहन मन सबही को ॥

श्री अग्रपद ११५-हम चाकर रघुनाथ कुँवर के । यम के दूत
निकट नहि आवत द्वादश तिलक देखि रघुवर के ॥ हौ
अयाच्ययाचौ नहि काहु हि आश्रित रहौ नही सुर नर के ।
एकै आश और नहि ध्यानों पायक भयो रावरे घरके ॥ लीन्ही
शैल सम्हारि नाम को लोक वेद सौ निजकरतर के । सुरनर
मुनि इन्द्रादि देवता नाहिन और रावरे वर के ॥ अधम उधार
लियो जन आपन मुनि सत वचन श्रवण सत गुरु के । अग्र
सुदास पटा लिखि पायो दसखत दशरथ सुतके करके ॥

श्री अग्रपद ११६-राग जैति श्री-यह मोहि दीजै राघव राम ।
दासनदास दासको अनुचर कथा श्रवण मुखनाम ॥ मोक्ष आदि
द्वै चार पदारथ मेरो नाहिन काम । चरण रेणु साधुन की शिर
पर कृपाकरो सुखधाम । सन्तनसों अनुराग निरन्तर इहि
विधि बोलौ याम । अग्रदास चाहत हरि चरचा सुधा सिन्धु
बिधाम ॥

श्री अग्र पद ११७- बिलावत—

सरयू सरिता राज सवन ते पुरी शिरोमणि रामपुरी । वेदन
हूँ बहु भेदन गाई महिमा जाकी अघट घरी ॥ शिव विरचि
मन का दिक नारद जगत व्याप्त जेहि घरि घरी । नाम उचार

होत अध न्यारे जीवन दुरमती दूर टरी ॥ जो कांड वसत
अयोध्या माही समसर ताहि न जात करी मृकर कृकर सर्व
विष्णु पद आवत जात न अटक धरी ॥ जन्म भूमि राघो की
प्यारी भुक्ति मुक्ति जह गरी गरी । अग्र अहै को जो नहि बांध्यत
वसत जहां सर्वदा हरी ॥ ———

सब तजि अवधपुरी रहिये ॥ राम रूप हिय राम नाम मख
करि सेवा गहिये । मज्जन 'पान सदा सयूँ' को सम दुःख
सुख सहिये ॥ जह तह राम चरित मुनिये नित सहजह
सुख लहिये । श्रीराम चरन रघुनाथ कुपाते नहि कछु
फल चाहिये ॥ ———

राग ईमनचीतारो-करत दोउ अरस परस शृ गार । गोरवरन तन राजकुमारी
सांवल राजकुमार ॥ धरत चन्द्रिका क्रीट शिरनपर पहिरावत उरहार ।
अखियन में अंजन आंजत जनु सान घरत शर मार । नकवेशर मोती जुसम्हारन
दरपन वदन निहार । राम सखे या युगल रूप पर बार बार बलिहार ॥

राजत दम्पति कनक भवनमधि रघुवर जनक दुलारी । भूपण वसन परस्पर
सजि अंग लखत मुकुर करधारी । चपलासी चहूं ओर सहचरी सेवित नव
सुकुमारी । रसिक अली तह रस भरि तानन गान करित गुन वारी ॥

श्री अग्रपद ११८-वशो मेरे नैनन में सियाराम । कल्प बेलि श्री जनक नन्दनी
रघुनन्दन घनश्याम ॥ राजत रतन जड़ित सिंहासन जुगल जोड़ि अभिराम ।
अग्रअली निखत यह शोभा वारत कोटिन काम ॥ ———

युगल छवि आज अतृप वनी । कनक भवन शृंगार कुन्ज में बैठे वनी ठनी ॥
कोटिन सखि सहचरी अमित लिये ठाड़ी सोज घनी ॥ रसक अली उर यह
समाज वसो लीला ललित मनी । ———

कैसी जोड़ी वनी मन भावनियां । इधर तो क्रीट ओ कुण्डन कि दुति अनोखी
है ॥ उधर भी चन्द्रिका चित चोरने में चोखी है । वो रोरि दिये हैं भाल ये
खोर केसर की ॥ इधर है नाशामणि लटक वांह वेशर की । तापर मृगुकान
अभी वरपावनियां ॥ कै० ॥ रहन चलन हर एक वांका पन निराला है । वहम
विलोक कसाकस भि क्यारि आला हैं ॥ अतृप रूप है शोभा मनोहर ओ मुख
धाम । (कि) जिन को देखि कै लज्जित हो जल गया खुद काम ॥ दोउ चित-
वनि कि कहर मचावनियां । कैसी० जवां सो कैमे वयां ये "रामजन" सखमा
(कि) तीनों लोक में जिनकी कहीं नहीं उपमा । ये जी में आता कि वश देखु
इनकि सूरत को । उठाके धरलुं हिय विच दोनु मूरत को ॥ भूले कवहूं न छवि
ललचावनियां ॥ कैसी० ———

क्या बूव वनी है भांकी मनोहर रामसियाकी । दोउ बैठे रतन सिंहासन कर सोहै
कमल सरासन यह सखस जनक धिया की ॥ दोउ मूरति परम मनोहर शिवजी
के अचल धरोहर । यह सम्पति हम सखियां की ॥ लखि राम सिया का जोरी

रति पति की मति भई भोरी मिलि गये रतन अखियां की ॥ लखि रूप अनूप
सुहावन भइ नेहलता अति धनधन क्या कहूं छटा छवि याकि ॥

हो दोउ चन्दा वशो हिय मेरे—

सिय प्यारी श्री दशरथ नन्दन अरुन कमल कर कमलन फेरे । बैठे सुर तर तर
सिंहासन आस पाश ललना गन घेरे ॥ गरभुज माल परस्पर अरुभे चारुशिला
मुख हँसि २ हेरे । श्रीप्रसाद सखि पान पवावति छत्र चँवर कर अलिगन
घेरे । बीण मृदंग साज युत कोउ अलि गान करति शौन्दर्य सुहेरे ॥

प्यारो तिहारी चन्द्रानन पर प्रीतम नैन चकोर कियेरी ॥ एक पलक टारन
नहिं चाहत जोहत है भुज अंक लियेरी ॥ तृप्ति न मानत कवहुं रसिक वर
रूपसुधा रस पान कियेरी ॥ धनिधनि भाग सुहागनि तेरो धनि यह सुखसरसात
हियेरी ॥ सिया अली यह स्वाद महारस तेरे कृपाबिन कौन पियेरी ॥

पगे रहो दोऊ निज प्यारनमें ॥ अरुभि रहो सुरभो कवहुं ना अरुभाओ हम
हम कोऊ ॥ अधर सुधारस पीवो पिवावो टुक जूठन मोहि देऊ ॥ सिया अली
मम प्राण के सरवश प्यार हमारि मिलेऊ ॥

क्या कहौं सुमुखी सलोनी वनि रही सिय श्याम की ! नेह की पालक सदा
दायक प्रणत विश्राम की ॥ श्री जनक नृपनन्दनी रघुवर प्रिया सुख कन्दनी ।
जग बन्दनी छवि गुण भरी वलि २ गई इस नामकी ॥ शीश पर मौरी मनोहर
चन्द्रिका छविधामकी । भाग की भाजन भली भाविक जनो के काम की ॥
जानकी जीवन जरी सी जानकी प्रिय राम की । देखि के छवि बिक गई ज्ञाना
अली बिन दामकी ॥

सियजू रानिन में महारानी । और सबै रौतानी ॥ चितवतभौंह खड़ी करजोरे
इन्द्राणो ब्रह्माणी गौरा रचि रपान लगावति, रमा खवावति आनी ॥ अठौंसिद्धि खड़ी
कर जोरे नवनिधि मनहु बिकानी । कोटिन ब्रह्माण्डन की प्रभुता रोमरोम
अरुभानी जोमाया एकै घाटे पर सबहि पियावत पानी । सोउ चाहत जाकी
करुणा को बार २ सनमानी ॥ जाविन पातौ हिलि न सकत जो सवघट मांह
समानी । संत जनन की इष्ट देवता राम प्रिया जग जानी ॥
हमारी स्वामिनी वो है जो सब रानिन में महारानी । सदा सेवै जिन्हें
सुरनारिनी निजकारिनी जानी ॥ धनद की छत्र लै छाजै भलै मुखल वरुन
वाली । लिये वीणा शभा में जिनके गुन गावत है ब्रह्माणी ॥ रमाबीरी खवावत
है उमालै इत्रकर लेपै । करै रति हर्ष युत जिन्हके जरी जूती की सेवकानी ॥
कहै हरिजन कहाँ तक है विदित सब श्रुति पुराणों में सकल । ब्रह्माण्ड की
नायक वही है एक सुभदानी ।

सिया जु के अरुणारे दोउ तरवा । मनो अनुरागिन के घरवा ॥ क्या गुलाब
क्या कमल कटीलो क्या वड़ लाल अनरवा । क्या कुसुम जल बुन्द परत ही
बिगरत रंग निचरवा ॥ क्या मखमल क्या सिरस कलंगी क्या मालती पतरवा ।

इनके कोमलता के आगे क्या कपोत वट परवा ॥ उरध पदुम कल्पतरु
अंकुश रेखन के उजियरवा । एक एक रेखन पर वारों त्रिभुवन को शृंगरवा ॥
जिनके धोवत डरत देवता जनु चुड़ परत इतरवा । इनसे लगन नसीं तो वृथा
दण्ड कमण्डल करवा ॥

सियजू तिहारो चरन । सुर नर मुनि सब करत बदन । तव पद पदुम सुमंगल
करन । तेहि तजि जाय नहि जिया की जरन ॥ यद्यपि अधम सब औगुन भवन
तदपि भरोषो तेरो करन भरन ॥ तब नाम अनुपम दुष्टन दलन । दैत निज
भक्ति सिया राम के चरन ॥ द्रबहु दयामयि तुव रामेश्वर जन । अब जनि
कर देरि राखिले शरन ॥

जो मेरो अवगुण उर धारो । तो मिथिलेश नन्दनी स्वामिनि कोटि कल्प नहि
मोर उबारो ॥ कौन सो किया कीन्ह में नाहिन यह ससार असार पनारो ।
वेद विदित विरद यह तिहारो सीसी सिसकत नाम विचारों ॥ जो ब्रह्माण्ड कोटि
के नायक प्रीतम राम स्याम छबि भारो । तव बस रहत सदा पिय नायक रसिक
शिरोमणि छबि मतवारो । यह जिय देखि प्रभुता निज नाते मिथिला ओर
निहारो । करुणा सिन्धु शील गुण सीमा दाशी युगल प्रिया न बिसारो ॥
तव पद पदुम बिहाय न भरोष मोहि जोहि जिय लीजै सुधि मोरि सिया स्वामिनी
यदपि हों अधम मलिन अध ओध खानि तदपि काहाउ मैं तेरि सिया
स्वामिनी ॥ प्रभू हूँते सरस क्षमादि शुभ गुण सिन्धु किरति वदति श्रुति तेरि
सिया स्वामिनी । ताहि बल सोच छाड़ि नामलै उदर भरो निदरि गुणादि कृत
केरि सिया स्वामिनी ॥ करत अधिक क्षोभ तोपे आप प्राण नाथ जोपे रंच तोर
दग हेरि सिया स्वामिनी । ताते वार २ कर जोरि मांगु दीन होइ राखु निज
चरण की नेरी सियास्वामिनी द्रवत न कौशल कुमार तव नेह बिनु करै क्यों न
कर्म योग ढेरी सिया स्वामिनी । जेहो नहि द्वार ते निकासे हूँपे दयानिधे सांचि
गुणि कहत हो टेरि सिय स्वामिनी ॥ जानै माया योगि ज्ञानी सिद्ध बिधि
सम्भू हूँलौ निज वश माहि किये जेरि सिया स्वामिनी सोउ तब भृकुटि
बिलोकति रहति सदा चाहति कटाक्ष कृपा केरि सिया स्वामिनी ॥ जनक
दुलारी रघुवंश मनि प्राण प्यारी अब जनि कीजं नेकु देरि सिया स्वामिनी
नेहलता प्रीतम सो दीजिये धराय कर बिगरि बनेगी तब मेरी सिया स्वामिनी ॥

शारद बिदुचय बिजित बरानन विधुकर निकर सुहाशम ।
मदन चाप जित भृकुटि कुटिल तिल सुमन मुक्त धृतनाशम् ॥
चारु जिबुक दर ग्रीव मनोहर स्वधर बिम्ब प्रति भाषम् ।
मुकुर कपोल चिकुर चय चुम्बित नयन सरोज विलासम् ॥
जनक सुता कर धृत पर नृत्यत ललित कण्ठ कृत गातम् ।
पद नूपुर रव रंजित दश दिशि उचरित ताल प्रमाणम् ॥
पश्य मुदा रघुनन्दन मतिशय चित्त चमत्कृत वेसम् ।
जनक सुता रंजित रति पति मद गंजन मग मशेषम् ॥
रसिक भनित सीता पति गीत ललित पदावलि नीतम् ।
सज्जन श्रुति सुखप्रद मिदमद्भुत मंचित लाल बिनीतम् ॥

यह प्यारी छवि पर बारियां

स्याम गौर सुन्दर मन भावन सोइ हिये बिच धारियां ॥

जनकलली रघुनन्दन दोऊ और सखी संग सारिया ।

रसिक अली के यह मन भावत और लगै सब खारियां ॥

बलिहारी युगल किशोर की ।

दशरथ सुत श्री जनक नन्दनी सुख सुखमा शिरमौर की ॥

अद्भुत शोभा निरखि परस्पर चितवत चित्त रस बोर की ।

रसिक अली बारत तन मन धनधन दामिनी मन मोरकी ॥

क्या सान चाल अल बेला गज लाज रहे मस्ते मस्ते । जिन देखा तित्तके चित
रतन अनमोल बिके सस्ते सस्ते ॥ रस रूप माधुरी टपक रही सखि ? जात रहे
रस्ते रस्ते रघुराज लला नृप नन्दनने मन छीन लिया हँस्ते हँस्ते ॥

पिय प्यारे के नैना, बड़े बांके ॥ चितवन ही घायल करि डारत पुरत न धाव
मलम्ह टांके पल परत न चैना ॥ व० । छीन लेन कुल कानि छिनक में मारत
मनहु मदनडांके । सरवश हरि लेना ॥ व० ॥ मद माते रसिकन रस रातेछवि
छांके नहि उपमा के । मोहन मन मैना ॥ ब० ॥ जेहि मन 'मौन, लगै सोइ जाने
मृदु मुमुकान भूमकि भांके । यह कासें कहूं वेना ॥ वडे० ॥

छवि अति बांकि हमारे हिय बसि गई । तन घन स्याम लसत पीताम्बर जनु
चमकन चपला कीट लिपाटि कटि कसिगई ॥ जिमि शशि ओर चकोर निरखि
छवि बदन सुचन्द्र कला कि रूप रस फँसि गई । अंग अंग अवलोकि मधुर छवि
कोटि मदन सुखमा की गरुरत खसि गई । मौन मुदित छवि अबध छयल की
भूमकि भरोखन भांकी दृगन मय धसि गई ॥

कल्याण-रघुवर बांधे चुनरिया पाग । प्यारी कि सारि चुनरिया सोहै जरी
किनारी लाग । मोतिन मय शिरपेंच कलंगी शीश फूल दुति जाग । रसिक
अली यह युगल माधुरी दरस करत बड़भाग ॥

खम्माच-वशो मेंरे नयनन में सियालाल । चपला घन कंचन मरकत दुति
राजिव नैन विशाल ॥ कोटि र रति मदन बिमोहन अद्भुत रूप रसाल ।
राजत कनक भवन में रसिक अलि संग रँगिली बाल ॥

देखिकै अरुभान्यो जियरा । राम कुमार श्यामसुन्दर वर हमहि नही सब ही
को हियरा । वन प्रमोद बिच जनकलली संग अली सकल जुरि आई नियरा ।
युगल प्रिया यह छवि निरखन को हिय बिच वारो सुरति को दियरा ॥

हेरनि हँसनि हमारो हरोहिया । बदन सुचन्द्र मधुर विहंसनि में, जादू सा कुछ
डारो गजब किया ॥ नैन सरोज बान घनु भकुटि, चितवत हिय हनि मारो
कतल किया । वेदरदी घायल मोहि करिके, फिर हंसि कस न निहारो न मारो
जिया ॥ नाम रूप नित घाम निरन्तर, गावत सुयश तिहारो शरन लिया ॥
रसिक चकोर चन्द्र छवि निरखें, रूप सुधारस प्यालो पिलाय दिया ॥ कृपा
मृदुष्टि सदा रसिकन पर, दै दै नैन इशारोजिलाय लिया । मौन मुदित मन
चरन कमल पर, तन मन सरवस वारो अवध पिया ॥

बिन देखे नयनवा ना मानै हो ॥ जब से लखि दृग माधुरि मूर्ति रूप सुधा
रस चसकाने हो । मुख सरोज मकरन्द पान करि जन मृगुर मन मस्ताने हो ॥
जिमि शशि ओर चकोर बिलोकत रूप सुधारस चसकाने हो । अहह सुजान
राम पिय तुम बिन कौन मौन मन की जानै हो ॥

अंखियन विच तुम को चुराइ राखों । कोटि करो पिय जाने न दै ॥ हियरा से
हियरा लगाई राखों ॥ मृदु मुसुकनि बांकी चितवनि में तन मन अपनो रंगाई ।
राखों सिया अली के दोउ जीवन धन सब विधि अपनो बनाइ रखों ॥
तोहि राखों पियरवा में केहि विधि मे ॥ दृग विच राखो हिया तरसत है हिय
पिच राखों नयन तरसै । एको बिधि धीरज नहि आवत प्यारे वताओ मिलो
कैसे ॥ दृग से दृगन मिलप्रो सांवरे हिय हिय से मिलो गर गर से । सिया अली
यहि भांति मिलो जब दर्द निटे अंग अंग परसे ॥

कवित्त

बाम भजन कोउ शाक्त हुये स्मृति ज्ञान में धशे हुये । कोइ निगूण ब्रह्म समझते
हैं सुखमना साधना कैसे हुवे ॥ कोउ अज पा को जाप करै निर्जन एकान्त में
बसे हुवे । जालिम हम हाय कहाँ जावें तेरे जुल्फ जाल में फँसे हुवे ॥

—★—

अंखियां राम रूप अनुरागी ॥ श्याम वरन मन हरन माधुरी मूर्ति अतिप्रिय
लागी ॥ सुन्दर बदन मदन सत शोभा निरखि निरखि रसपागी ॥ रतन हरी
पल टरत न टारी परम प्रेम रंग रागी ॥

अंखिया रामरूप रसभीनी कोटि काम अभिराम श्याम घन निरखि भई लय
लीनी ॥ लोक लाज कुल कानन मानत नूतन नेह रगीनी ॥ रतनहरी कैसे
अवनिकैसे होगइ ज्यो जल मीनी

फन्द में फँसा आनिकै मनमोर किसी का । उलझन है कठिन इस में है क्या
जोर किसी का ॥ खो जातो है उरलाज सदन की चिन्ता यह । नवनेहका फल
इस में नहीं सोर किसी का ॥ सन्सार कि सुधि कैसे के रही जात सखोरी ।
मिलजाय निराले में जो चित्तचोर किसी का ॥ में आज कदाचित जो किसी
भांति चले जाउ । फिर आके अबस दरस करू भोर गिसी का ॥ हरिजन जो
कही देखिपरै रूप अतृपम् । सच है नहि टरता हैं दृगन कोर किसी का ॥

जानकी रमण रसिक मनि रघुबर रघुकुल भूषण प्यारो । अति सुँकुबार उदार
ललित छवि मदन बिमोहन हारो ॥ सरद बिमल बिधु निन्दत मुख छवि अमित
कला उजियारो । रसिक अली पिय बिहंसि बचन मृदु जु बसि मन्त्र उचारो ॥

मन में बशीबश चाह यही प्रियनाम तुम्हारा उचारा करूँ । बिठलाके तुम्हें मन मन्दिर में मनमोहनि मूर्ति मिहारा करूँ ॥ भरिके दृगपात्र में प्रेमकाजल पदपंकज नाथ पखारा करूँ । वन प्रेम पुज्यारि तुम्हारा प्रभू नित आरति भव्य उतारा करूँ ॥ तुम आओ न आओ इहां तुमको निशिवासर ही में बुलाया करूँ तेरे नाम की माला बनाऊँ सखे मन से मनको परकाया करूँ तेरे प्रेमि जनों का मैं प्रेमि बनौं तेरे चाहने वालों को चाहा करूँ । जिस पंथ से आओ गे आप प्रभो उस पंथ में पलक विछाया करूँ ॥ तुम जान अयोग्य विसारो मझे पर मैं न तुम्हें बिसरायाकरूँ गुनगान करूँ नित ध्यान धरूँ तुममान करो तो मनाया करूँ ॥

क्या बुलाक अधरन पर हलकै । जबते दृष्टि परी या मूर्ति तबते छिन पल परत न पलके ॥ किधों आशम शर शर सन्धान्यो की सुखमा की सर वर झलकै । सिया राम पिय मुख मयंक पर मनहु अमी को मूरति छलकै ॥ कवन सहै चितवनि की चेटी ॥ करत विहाल ढाल नहि मानत गिनत नही कोटन की ओटै ॥ अंग २ दंग अनंग रंग बशि घायल परी भूमि पर लेटै ॥ सियाराम हिय वेधि नयन रस जान लिया जनपति के ढोटै ॥

लगन लगी तब कौन करै डर । सब शंशय मिटि जात अलीरी बदन बिलोक मीत अपनो कर ॥ बून्द अकाश पपीहा चाहत यदपि भरे अगमग सरिता सर ॥ करुणा भरे खरे घर वारे रोवत, सती चढै अपने सर ॥ लोक लाज कुल कानि तब लौ जबलौं प्रेम रशी न फंशी गर । प्रेम सखी बलि भगड़ा कौन है, यह तन बेच्यो लबध छयल कर ॥

धुंधुरारे बार जिया लियारे । देखत दिल दरम्यान दखल दिया, जादू सा कछु किया रे । पिय २ रटत अटत आरत है । निशि दिन तलफत हियारे । सिया राम सस्मेर लगी उर घायल परी केति कन तियारे ॥

तनिकै हंसि हेरैरी । राजकुमार बुद्धि बौराय हिराय जाय मन, रहत न देह सम्हार ॥ दूरिहिते जाके तन ताके मदन भयो जरि छार । सो त्रिपुरारि भिखारि भेष धरि अलख जगाई द्वार ॥ सपनेहु निकट जाय नहि कबहुं माया मोह विकार । सो भुषुण्डि शिशु चरित बिलोकत फसे प्रेम की जार । सुनत बोल बिमोल विकानी सारद सी हुशियार । राम शहाय जाय सोइ जानै अवध नगर कि बाजार ॥

श्रीराम बधाई उसव

श्री अग्र पद (११६) आसावरी-आजु बधावो दशरथ रायकै जायो राजीव नैन । आये सुख के ऐन ॥ चैतमास नौमी उजियारी यह संयोग अनूप । लगन महरत बार ग्रह चरन चिन्ह बड़ भूप ॥ बशिष्ठ आदि तपोधर धारी कीन्हो यह निरधार । दुष्टनि दुखद सुखद सन्तन को भूमि उतारण भार ॥ घर २

तारण घुजा पताका मुक्ता वन्दन वार । दूव पूत भरि नारि मुहागिनि साथिये
लिखति द्वार ॥ चन्दन चौक रचित आगन में दधि अरु दूव बघावै । कनक
थार सीपज, भरि अक्षत मिलि संग मंगल गावै ॥ भू देवन कहं भूमि वाजि गज
धेनु तन रथ देहि । पाइ लाग समदात नरेश्वर मुदित आगिका लेहि ॥ पणव
निशान मृदंग शंख घुनि जै जै शब्द उचार । कौतूहल कौशलपुर वासी आनन्द
बढ़यो अपार ॥ मागव सूत भाट वन्दोजन दान मान बड़ पावै । वर्णाश्रम
अन्त्यज जे तन घरि फूले अंग न मावै ॥ नृत्य गान वा जन्त्र वेद घुनि ठौर २
यह भनिये । लेहु २ यह कहत नगर में और श्रवन नहि मुनिये ॥ सुरतरु काम
धेनु चिन्तामणि कौशल्या मुन जायो । अग्रदास रघुपति के आनन्द में वाञ्छित
फल पायो ॥

श्री अग्रपद १२०) देखि द्वार भूप दशरथ के सोभा कहत न आवैरी । मूर्ति
वन्त मुक्ति सिधि ठाढ़ी भीतर जात लजावैरी ॥ मनिमय अजिर अनूप देखि
छवि भांक लेउं सुत छावैरी ॥ कोटि काम बलि कोटि भानु दुति अमित तेज
तन धारेरी , घुंघर वारे केश वदन पर चंचल अधिक मुहावैरी ॥ मनहु कलप
तरु तेज तनक अली मधुर सुधामद मातेरी । उज्ज्वल भाल सुचक्षण ऊपर
श्याम सुभग तन सोहैरी ॥ वरणों कहा विशाल नैन अतिता उपमा कहं नाहीरी
इन्दु वदन पर उडुप रहै दोउ लोल मीन की नाइरी ॥ वगना कण्ठ विराजत
मानहु ऊपर सुभग निकाईरी । दुतिया चन्द अनन्द जानि कै धन में देत
दिखाईरी । अरुण पीत सीत हरित कुंघनई स्याम सुभग कटि सोहेरी । जलद
घटा पर मनहुं प्रकट भये ईन्द्रधनुष मनमोहेरी ॥ कौशल्या की कूख कलप तरु
रामचन्द्र फल लागैरी । पुण्य प्रभावते अगम अगोचर कौन सुकृत यह जागेरी ॥
शंकर शेष विरैचिशारदा जिन्हि स्वरूप नहि जानैरी । ताके गुण अलि अग्रदास
कछु मति अनुमान बखानेरी ॥

श्री अग्रपद १२१-आसावरी-प्रगट भये दशरथ के रघुवर । महामहोत्सव मंगल
घर घर ॥ देखो आजु अवधपुर शोभा, नरनारी आनन्द उरगोभा । सुनत सबै
आतुर हेइ घावें, हरित दूव दधि नृपति बँधावें ॥ मोतियन चौक बघाओ गावें
नव तरुणि साथिया बनावें । ध्वजा पताका मण्डित घर घर, दिव्यदुक्कल
सुगन्ध सिचिघर ॥ घर अम्बर बाजे बहु बाजें, मनहु महोदधि लहैं गाजें ।
विप्र वेद घुनि व्योमनि परसत, मुर सघट कुमुद्यानि अति वर्षत ॥ भोर भूप
घर अतिशै राजै, कोउ लेवै कोउ देवै काज । भूमि वाजि गज विघ्न पाये, धेनु
रतन अन बसन अघाये । याचक जन ता चरण जो आये, दान मान वाञ्छित
फल पाये ॥ कहत सबै धन बचन हमारे, चिरंजीवो ये पुत्र तुम्हारे । अग्र बघाई
यह नित पावै, जन्म कर्म लीला गुन गावै ॥

श्री अग्रपद १२२-राग टोड़ी-राम जन्म आनन्द बघाई ॥ सुरतरु सुधाधेनुचिन्ता-
मणि मिलत परसार दूव बँधाई । प्रफुलित हृदय नगर वासिन के बाल वृद्ध
सब बात सुहाई ॥ भई भीर नाचे नर नारी बाजै बहुत गने नहि जाई । मंगल

कलश चौक मोतियन के द्वारन बन्दन बार बँधाई ॥ शिशु को बदन निहारी
नारि सव वारति भूषण लेत बलाई । रतन गर्भ कौशल्या रानी धन्य भाग की
करत बड़ाई ॥ दशरथ राय न्हाय भये ठाढ़े कनक वसन अन्न धेनु मगाई ।
परम पुनित बिप्र पद बन्दित दान मान जन घन वर्षाई ॥ मागध सूत भाट बन्दी
जन अष्ट सिद्धि नव निधि पाई दशरथ सूत नित प्रतिहौ देखों अग्रदास कै
यहै जिय भाई ॥

श्री अग्र पद १२३—ढाढीपद राजपरज-तिहारो ढाढी आयो हो रघुवंशी यजमान ।
जन्म २ ढाढी या घर को मान सहित दे दान ॥ रबि अनरण्य इक्ष्वाकु ग्रंग
रघु धुंधुमार युवनाथ । काकुथ सगर दिलीप भगीरथ गंगा अवनि प्रकाश ॥
हरिकीरतिसम वंश विशद अति मोमति जाय न जान । इक्षा सुत शारदा शेष
सुर वेद पुरान नखान ॥ सुत जायो सुनि पंगतिरथ के मोमन रंग रली । उप-
जीवी अज भूप द्वार को वारी सुफल फली ॥ लछिमन भरत सत्रुहन सुन्दर
न म सकल गुन सार । धीर गम्भीर अभैयकरि मति सो अतिही शील उदार ।
मैं पाई सन्तनि मुख ग्रन्थनि सुनहु नृपति दै कान । जन्म न देख्यो रामचन्द्र
को भूत भविष्य बर्तमान ॥ वेद उधार कमठ करुणा कर धरणी घर त्रय नैन ।
हरष फरषधर, अमुर विमोहन बिंग बचन सुनि जैन ॥ ऋषि मष सन्त धर्म
रखवारी कौशल्या सुत करिहैं । दुष्ट दमन करि वांधि बारि निधि विपति देव
नव हरिहैं ॥ भू कन रेणु बुन्द वर्षा की उडुगण है निरधार ! गर्बित बचन
सुनत ढाढी को रघुपति गृणनि अपार ॥ धर्म सार श्रुतिसार शिरोमणि काति
अधिक तन तेज । चरण चिन्ह सरवेश्वर के सब बिधि मनु रच्यो बन्धेज । ढाढी
अग्रदास दशरथ गृह याचत बारम्बार । साधू संगति कीरति तव सुत की रचो
रहों दरवार ॥

श्री अग्र पद १२४—राग टोड़ी सूर फागता — आज दशा दशरथ नृप की अति
रानी रतनखानि कुषि खूली । सुनत सुधा बरष्यो त्रिभुवन में सन्त कमल श्रेणी
हृद फूली ॥ लछिमन भरत सत्रुहन सुन्दर प्रगटे राम सजीवन मूली । शिव
विरचि सुर शेष नीलधर गुण गण गान शारदा भूली ॥ अष्ट सिद्ध नव निद्र मुक्ति
चतुर्धा अवध के द्वार द्वार अनुकूल । अग्रदास रघुनाथ जनमते मंगल अवर नहीं
कोइ तूली ॥

श्री अग्र पद १२५—राग गौरी—नृप दशरथ के पुत्र भये सुर पुर में वज्रत बधाई
री ॥ घर २ मगल चार अवधपुर बन्दनवार बधाई री । चतुर सखी मिलि
साधियां दीन्हे विधि सो सीख भराई री ॥ चन्दन चौक रचित आगन में रतन
जड़ित अँगनाई री । कृत कौतुक कौशलपुर बासी याचक अभर भराये री ॥
अवधपुरी आनन्द भयो भर वांटत बहुत बधाई री । अग्रदास रघुवर के जनमत
मन वांछित फल पाई री ॥

श्री अग्र पद १२६-आसावरी- फूले फिरत अयोध्या वासी । सुन्दर सुत जायो
कौशल्या रामचन्द्र सुख रासी ॥ घर घर बन्दन माल साथियां मोतिन चौक
पुराये । नाचत गावत देत बधाई मनु घर २ सुत जाये ॥ गली २ गज वाजि

जहां तद् हलका दिये तवेले । दान बहुत याचक जन थोरे कापै जात सकेले ॥
दशरथ भूप भण्डार मुकर किये बन्दी अभर भरे । सकट सोलि ताही सों हमला
ढोये ढेर धरे ॥ सन्त कमल सुख देन काज रवि राघव उदै करयो । मुदित देव
दुन्दुभीं बजावत निश्चर तिमिर हरण्यो ॥ देत अशोश नगर नारीनर चिरंजीवो
रघुवीर । अग्रदास आनन्द अखिलपुर मिटी ताप तन पीर ॥

श्री अग्र पद १२७- लाल इन बोलन के बलि जैहों छोटे २ चरण धरत अति
सुन्दर ठुमकि ठुमकि हलरैं हौं ॥ कटि किंकिनि पग नूपुर वाजे मधुरे शब्द
सुनैहौं । सब बालक रघुबर छवि निरखत प्रेम प्रीति लपटें हों ॥ घुंघर वारे
पलक बदन पर मन्दहसन सुख पैहौं । जाको ध्यान धरत ब्रह्मादिक सारद गान
करैं हौं ॥ गोदराखि पय पान करावत दशरथ लेत बुलेहौं । यह छवि देखि
मगन सुर मुनि भये रवि शशि कोटि लजैहौं ॥ शिव सनकादि आदि ब्रह्मादिक
निगम नेति यश गँहों । अग्रदास भजु दशरथ नन्दन दिन प्रति दिन अधिकहों ॥

श्री जानकी जन्म बधाई उत्सव

श्री अग्रपद १२८-अखिल लोक श्री उदय भई हैं जनक रामपुर जाई । निर-
उपम कन्या निमि कुलके सीता ऐसी नाई ॥ बरनत बिदुष पार नहीं
पावत बांकि रही लजाई । जाके चरण कमल भव नौका नाहिन सान
उपाई ॥ निगम सार सामान सुयश जेहि कहत तपोधन आई । ब्रह्म रुद्र
अजहूँ पद आश्रित अग्र दास बलि जाई ॥

श्री अग्रपद १२९-ठुमुक २ चलत चाल जनक नन्दनी ॥ मधुर वचन तोतरे
त्रयताप मोचनी ॥ सोहत नव नील बसन मन्द हास रुचिर दशन भलकत
उर माल सकल देव बन्दनी ॥ वाजत पग नूपुर मनो शाम वेद करत
गान क्षुद्र घंटि रुचिर नाद उर अनन्दनी ॥ जगत मात सखिन संग
विहरत बहु करत रंग अग्र अली निरखत छवि भवनिकन्दनी ॥

श्रीमती सर्वेश्वरी जू को बधाई

बधइयां गुइयां हिलि मिलि गावो राज ॥ चन्द्रकान्ति जु कि कोखि सी
रानी, सुतासु जन्मी आज । सत्रु जीत नृप देत मुदित मन, पट भूषन
गज बाज ॥ हरषि बुलाय २ याचकन बिदुषन विप्र समाज । बाल अली,
नौबत धुनि वाजहि, जनु सावन घन गाज ॥

लखोरी मिथिला मोद भरी ॥ माधव गुवल पक्ष पूरन तिथि वासर चन्द्र
धरी । चित्रा नखत लगन वन वनि वह धन्य सो धन्य धरी ॥ रानी चन्द्र
कान्ति नृप अरिजित सुकृतकि वेलि फरी । जन्मी चारुशिला नू तिन की
चन्द्र अली अनुचरी ॥

दोहा—अतिमाधुर्य स्वरूप सिय पिय पद पंकज प्रेम ।
गुन ऐश्वर्य स्वरूप श्री चारु शिला करधेम ॥

हाय हमेशा हरदम निकरै विकसै वदन पियाये हैं । प्याला मौक जौक
जालिम का कहर मिहर सम भाये हैं ॥ आव अजूब खूब प्रीतम रख
सो सुख सहज प्रकाये हैं । युगला नन्य शरन यह लच्छन वेगम हृदय
हुलाये हैं ॥

सुनि आइरी आज में तो होरि किभनक । रंग डारोंगि बाहिपै जिनतोरयो
है धनुष ॥ भूमि २ उठि दौरि महल ते केशरि रंग कुंकुमा कनक ।
खेतल राम जाकी के सग होति मधुर पिचकारि कि सनक ॥ कोइ कहै
रंग डारो लखन पै कोई कहै या खिलारी पै तनक । कोइ उमगि मख
मलत लाल के कोई हंसत दै दै तारिकि ठनक ॥ अति आनन्द होत यहि
पुर में उड़त गुलाल अगर कि सलक । तुलसिदास धनि २ राजा दशरथ
धनि २ हैं मिथिलेश जनक ॥

अनुजन संख लिये होरी खेलत राम उदार ॥ गृह २ ते वनिता वनि
आई कीन्हे विविध शृंगार ॥ कुम २ अगर अवीर गुलालन संगलिये बहु
भार । उत रघुवीर सखा वनि आये रंग भरे पिचकार ॥ एक ओर
मिथिलेश कुमारी उत अवधेश कुमार ॥ खेलहि फाग भुमुटि दोउ दिशि
ते काहुहि सुधि न सम्हार । वर्षहि रंग अवीर गगन धुनि वाजन गान
अपार ॥ एक सखी होइ सखा रामढिग आइ, 'मुनहु मत सार' । राम-
चरन मुख भूमि परानी हसि रहे राज कुमार ॥

उफवाजी जनक दुलारी की ॥ डफ वा० ॥ नवसतसातसजी सब
सखियां नव योवन मतवारी की ॥ ड० ॥ भूपटि लपटि सब सखा
भगाये धूम मचाई गारी की ॥ ड० ॥ राजकुंकार को पकड़ि मंगाई जीत
लिखाई प्यारी की ॥ ड० ॥ कृपानिवाश रसीली अंखियां रसिकजनन
रसकारी की ॥

परी मेरो स्याम सनेही मेरे वश अनुराग । अधरामृत दै गल भुज मेलो
खेलोंगी संगफाग । कुचनि गुलाल लालपर डारों उरभौ मनमथ जाग ॥
नैनन की शैनन सौ छिरको प्रगट करौ सब लाग ॥ पिय के शीश

उठाउव चूंदरि मैं जुधरों शिर पाग । लाल नचाऊं अपने आगे में गाऊं
हंसि राग । जोइ जोइ कह्यो कियो सिय प्यारी भारी भरि हैं सुहाग ।
कृपा निवास महामुख निरखत सखियां सराहत भाग ॥

संझयां जाने न पैहौ डारो न मो पर रंग । श्री मिथिलेश लली जु कि
अलि सब, आनि जुरी यक संग ॥ सुनि संकुचाय रंमाय दृगन दृग बोलत
बचन उमंग । काह करेगी विपुल नारि लगि जाओ हमारे अंग ॥ कन्ठ
लगाय भिजाय भिजे रंग वाढ्यों परस्पर जंग । युगल प्रिया यह पाग
अनोखी लखि रति पति मद भंग ॥

स्याम मुख रंग कि बूंद ढरी । मानहु काम कसौटी ऊपर कंचन की कस
परी ॥ अलकें चुवै मनो घन माला रस अनुराग भरी । कृपा निवास
अली गण अखिया सियवर रूप अरी ॥

खम्माच—होरि के खिलारि रंग डारो न रसिया ॥ चुनरि भिजोइ मोरि
चटक छबीलि किय कहां लो सङ्गि तेरीं नित नई हंसिया ॥ धरि
भकभोरि मोरि मोति लर तोरि प्यारे । ऐसि बरजोरि रोरि भरत
दृगत मोरि, ताहूँ पै मारत तकि चितवनि गंसिया ॥ शुभगा सलोनि
चारुशिला अतिशीला अली । सौज तयारि सारि कियो है सुन्यारी
न्यारी ॥ तहां जीत पावो तब जातु में तुम्हारो बल, ज्ञाना अली खेलें
पिय प्यारी छवि लशिया ॥

मोसों नाहक करि बरजोरी लालन होरी खेलीहो । में कोउ हेतु अकेलि
गलि गइधरि कर करहि मरोरी हो । विनय बरजि तरजो नहि मानैसान्यो
मुख में रोरी हो ॥ लाज नहींगुरु जन पुर जन तोहि अवमें काह करौरी
हो । कोविद कवि ढवि होरि नहीं यह २ है भोरा भोरी हो ॥

होरि के दिनन में रोष नकरिये मानो जि मानो मेरि बात । लखि न
सुनी यह रीति अली हम खेलत में खुनसात । विनय करत रघुलाल
संवरो पद गहि हाहा खात । सीचिय मुघर शिरोमनि सियजू पिय पादप
कुमिलहात । मृदु हंसि हेरनि वंक विलोकनि शंकनि पिय कदरात ।
सनख आवत हमसों अलिगुग जोरत कर जलजात । सखि मुख पिय की
विनय सुनत सिय मृदु वचन करि मुस्कात रसिक अली रस रंगभरी
पिचकारि दई पिय गात ।

सखीरी काह कहूमें अवधके छैला छली । जात रही सयू जल भरने मिलि
गये बीच गली । लेकर कंज गुलाल मजे से मेरे मुख में मली । मधुर अली
महबूब बली सो कछु नहि जोर चली ॥ सारी भीज गई पिय डारों न
मोपर रंग । सीतभरी कम्पत तन मेरो दीजै गल भुज संग ॥ लखि
ललचाय ललकि लै प्यारी खेलत नवल उमंग । रसिक अली सुन्दर मनि
रघुबर वाजत मृदु रव चग ॥

री वह पीरी न जानत अखियन भरत अबीर ॥ मुसुकावत धरि नरम
कलाई खैचत धरि २ चीर ॥ भकभोरत मोहि पकरि २ अंग मारत
तकि दृग तीर ॥ मोहनि छिन २ अंक भरत है कसि कसि के वेपीर ॥

खेलैं राघोजि तियन बिच होरी हो । लाल गुलाल भरे तन सोहत मरकत
शैल अरुन परस्योरी ॥ बिथुरे कच आनन छबि राजत चन्द चहूँ दिशि
राहु फिर चोरी । कर कंचन पिचका अस सोहत जनु अहि मनि मुख लै
निकस्योरी । पकरि तियन मुख रंग मलत जनु राहु अतन लै शशि
भगरचोरी । रसिक अली यह रूप सुधानिधि जानि अछै मन मीन
फंस्योरी ॥

सांवरो होरी खेलन आवै । रंग पिचकारि छिपाय बसन में औचक आनि
भिजावैं ॥ या अवधेश को छयल नयो सखि कर गहि कम्प बढ़ावैं ।
रसिक पिया भरि आंख अकीरन अट पट वैन सुनावैं ॥

पिचकारि तिहारि रंगदार लला जू जानि डारो मौपै । सी उपजावत
कम्प बढ़ावत रहत न देह सम्हार ॥ अमित हजारा से छबि छूटत
कसकत हृदय हमार । रसिक पिया दृग चोट चलावै सुन्दर राजकुमार ॥

॥ इति श्री अग्र स्वामी जी कृत पदावली सम्पूर्णम् ॥